


NKONKO NÈ MANDAMUNA

 Udi nè cintu kampàndà cyà kuyiishapù anyi? [Mwanèètù Neville ùdi wàmba nè: “To, mukalenge.”—Muf.] Kàdi bishi bwà Mwanèètù Beeler wawa? [“Bwèndè yèyè ncyèna mumanyè to.”] Mwanèètù Beeler, udi nè diyiiisha bwà dilòòlò edi anyi? [Mwanèètù Beeler ùdi wàmba nè: “To, mukalenge.”] Ndi—ndi nè díyi dimpàte ndambù. Ncìcìvwa nè ndambù—ndambù wa nkonko. Bu nè kabàvwa . . . Bu umwe wa ku bânà bèètù aba mwà kwangata nè kuyiisha, mvwa mwà kwikala nè disànkà.

Mpindyewu, kanùsaluku to. Eci kí . . . Eci cìdi ànu tulùlù twà disambila tuyaayà ku Àfrikè. Byònsò ebi bidi nè cyà kukòshiiibwa mu tulùlù twà disambila, nènku bàvwa baswè bwà mèmè kutùsambidila mwab’ewu dilòòlò edi, pàmwè nè tùmwè tubòmbì tùle. Nènku mvwa ndyàmbidila nè tudi bafwànyine kulàmbula byònsò ebi kùdi—kùdi Mukalenge. Ebi bidi bikèngela kukòshiiibwabì byònsò bwà kundyànjidilabi kumpàlà mu Àfrikè. Mpindyewu, nudi bamanyè nè mbùngi kaayi bwà tulùlù twà disambila twikalàci mwà kwenza mu tupesa twà bunène nùku, binunu byàtù’s. Mwanèètù Fred wàkalwa naatù ditùkù adi nkàmà mwandamutekète mu kàbòmbi kakesè kàà bunène ebu. Kàdi nudi mwà kudifwànyikijila cìdi eci—nè mbùngi kaayi bwikalala eci nùku mwà kwenza’s. Pa nànkù tudi . . . Ànu mu katanci kakesè cyanàànà, mòna’s, netùcisambidilè.

² Mpindyewu, mèmè díyi dimpàte ndambù, kàdi mvwa mwàmbè nè nèngàalukilè bwà kwandamunakù yimwè yà ku nkonko eyi—eyi nè mwànyì pàànyì mwònsò mùndiku mwà kwandamuna amu. Nènku mpindyewu, misangu yònsò, pàdi matàbuluja aa àkùtuka, àdi àbanga divùndulula dikesè. Nènku ndi muswè—mvwa ndyàmbidila pàmwàpa nè eci ncìfwànyine kukùumbajila èkèleeziyà dilòòlò edi, nudi bamanyè’s, bwalu misangu mikwàbò cintu kampàndà cìvwa cìfwànyine kwikala cyambiibwe nè èkèleeziyà kàyi mucyumvwe to. Nènku mbakupèèshe mpùngà wa kufùnda lukonko lwèbè sungasunga mpindyewu. Nènnùpèèshè eyi yìndi naayi; nè pashiishe, nwènù biikàle nè cintu kampàndà bu nànkù, kabyàkukèngela bwà nwènù kulùfùnda to.

Nè pashiishe lùmwè lwà ku yòyi lùdi nè: **Bu wèwè mwà kuswà umvwijàku Loomò 7.25.**

Lùdi lùlonda lùdi nè: **Wèwè wákamba nè muntu ùdi mwà kwikala nè nsòmbelu wa mulamàkàne menemene nè Nzambi mu mùshindù wà kàyi wènza mpèkaatù to.**

Netwikalè bafwànàngàne nè cinyi mu dibiiikà dyà ku lufù?

Mwanèètù Branham, muntu ùdi nè cyà kwenza cinyi pàdiye mulondà mèyi ónsò à kulonda àudi mulongèshe awu; nè

pashiishe, mmunyi múdi upeta Nyumà Mwímpè?

Bu wêwè mwà kuswà ùmvwijàku Ebèlù 6.4 nè ucipàlakaja nè Ebèlù 10.26.

Nè: Ncinyi cìdi didyànjila-kulongolola kumpalà kwà difùkà dyà dyulu nè buloba dyùmvwija; nè mpenyi mu Bible paùdi mufwànyine kusangana cintu bu nànkù?

³ Nènku Mwanèètù wa bakàji Mc-... To, aci—aci ndilòmba dyà disambila.

⁴ Mpindyewu, ke nkonko yètù yitùdi naayi bwà dilòlò edi nyòyi ayi. Nwènù biikàle nè lukwàbò patùcidi ànu munkaci mwà kwenza byà mbanngu wa disangisha apa, èè, wêwè lwàkù naalù kùnweku, nènku netùteetè ànu... Mpindyewu, kwòkò kwikàla lukonko kampàndà mu meeji à èkèleeziyà pa cintu kanà cyònsò citùdi—citùdi naaci, mòna's tudi baswè ànu bwà—bwà kwikala bakùmbàne bwà—bwà kunwàmbulwisha nè mwètù pèètù mwònsò mutùdiku bamanyè amu. Nwamònu anyi?

⁵ Nènku ndi muswè ànu bwà nwènù kuvùluka misangu yònsò nè eci cìndi ngàmba mwab'ewu, ncyèna ngàmba nè aci cìdi ànu Bulelèlè bushindamija nè bikwàbò byònsò to. Ke cyà citàmbe bwímpè cìndiku mumanyè nè m'Bulelèlè bushindàme bwàci. Ndi—ndi mwà kwikala mu dipanga bu muntu wa cifwàkà kanà yònsò ewu, kàdi ndi ànu, Mwanèètù Jackson—ndi nteeta ànu kucyùmvwija mùshindù wùndi mèmè ngèèla meeji nè ngudi mukùmbàne (nudi numòna anyi?), mùshindù wùndi ncimòna's, Mwanèètù Mike, mu Bible, ànu... Nènku mu kulonga kwà bintu ebi, ncyèna ànu ncyàngacila mwaba ùmwèpelè to. Ndi—ndi ngàalukila nè ncitwàdila kwangacila ku Genèsè, nè nya naaci too nè ku Bwàkabuulwibwà, ànu buludì mu Bible.

⁶ Nè pashiishe, udi mwà kutwàla nè—mene cyena-bwalu cijimà. Kàdi, cyòci kaciyi cìnwàngana nè bikwàbò Byèndè abi muntwamu to, bikwàbò byà Mifundu, díbà adi cìwma mwà kwikala ntùpàkànyi nànsha bishi. Wêwè muyè naaci mwaba kampàndà, cìdi nè cyà—cìdi nè cyà kukùmbanangana nè Mifundu mikwàbò yònsò. Nudi numòna anyi? Nè Mifundu yònsò neyikumbanganè pàmwè Yòyi misangisha mu mùshindù mujaalàme, bu... Yidi ànu mùdi dinàyà dinène dyà kapanda mutù. Nènku ncyèna nè meeji à... Mèmè ncyàmba bibi, díbà adi Nzambi àmfwilèku luse. Mifundu mmifwànàngane nè dinàyà dyà kapanda mutù. Nwamònu anyi? Aci... Cyònsò ncisopakaja nè cibwejakaja mu kashèètè, nènku bìdi bikèngela Nyumà Mwímpè bwà kutèeka cyòci aci kaaba kàmwè. Nwamònu anyi? Nènku—nènku katwèna mwà kucyènza to. Mpindyewu, kakwèna muumvwija àDì nkàmà citèemà nè makùmi àsambòmbò nè citèemà mashìilàngane to, bwalu Bible mmwàmbè nè Mifundu kí nyà didyùmvwijila dyà muntu pàà nkàayèndè to. Yidi ànu mùshindù ùdìYi mifundiibwe awu. Tudi ànu tuYitabuujà bwà...(Twasàkidila, Mwanèètù Pat.) Tudi...

Yidi ànu mùshindù wùdìYi—wùdìYi mifùnda mu Bible awu; ke mùshindù ùdi ùkèngela bwà twètù kuYàngata, mùshindù awu. Pa nàнку twètù tuteeta bwà kuYifikisha ku dyamba cintu kampàndà mwab'ewu, èè, kaYàkwamba cintu cimwècimwè aci mwab'ewu dībà adi to. Nwamònu's, bu twètù—bu twètù batèèke. . . Bikèngela bwà ùfikishè Mifùndu ku diDyàndamuna mwab'ewu, kuDyàndamuna mwab'ewu, kuDyàndamuna mwab'ewu, ànu wònsò wùbwela buludi mu kaaba Kààwù bwà kuYifikisha yònsò ku dikùmbanangana.

⁷ Nènku mpindyewu, mvwa ngèèla meeji pàmwàpa nè. . . Mvwa nè cyà kwakula nè mwambè nè mvwa mwà kwakula dilòòlò edi pa: *Tudi Bamòne Mùtootò Wèndè Ku Esètè, nè Tudi Balwè Bwà KuMukuukwila*; kàdi ncyèna ànu nè dīyì dikùmbàne to, nènku, bwà kwenza nàнку. Mvwa muumvwe luuyà mwab'ewu dilòòlò kampàndà nè kupàtuka. Nènku mvwa nè luuyà lukolè pangàakabwela mu kàshinyi, mèmè kàdi kufwimisha mmwènu yònsò. Mèmè kupwekesha didìdiishì nè kuya kumbèlu. Èè kùdì—ndi ngèèla meeji nè cīvwa mmu diināyì anyi mu diitānù dilòòlò. Dilòòlò mene dyàkalondà adi, mèmè kubanga kuumvwa—ditùkù adi—mèmè kubanga ngènda ngùm vwa dīyì dyènda dīmpàta ndambù, byenze bu. . . Kaa, cidi. . . Ncyèna—ncyèna nsaama to, mubidi kawùvwa nè kapyà to, disaamà nànsha dīm wè, cimpumpu nànsha cikesè; kàdi bìdi ànu bu mùdì—bu mùdì byà pa muminu bisaamà mu muminu wèbè bifùmina ku dyakula nè—nè patàpìke ku dīyiisha bikolè, nè pashìishe—nè pashìishe kupetawù mashika. Kàdi nebiikalè—nebiikalè ànu bīmpè mu ditùkù dikwàbò anyi àbidi, pàmwàpa patwàmbà kufika ku dyàlumingu. Ndi mufwànyine kulwa bwà kukwàcishakù Mwanèètù cyàkàbìdì. Paanyimà pàà yèyè mumanè kujikija dīyiisha dyèndè, nènkenketè bwà kumòna nè ncyìni cikwàbò cidi cishàale.

⁸ Nè pashìishe—nè pashìishe ndi muswè bwà èkèleeziyà mujimà àpetè Nyumà Mwìmpè. Mpindyewu, mukàj'a-mwanàanyi mmusòmbe kaaba aka. Kì nè mbwalu mmukàj'a-mwanàanyi to, kì nè mbwalu ùdi kaaba aka to, yèyè ngumwe wa ku bàna bàà bakàji bàà batàmbe bwìmpè bāndìku mumanyè; n'nsongàakàji wa maalu malenga, Loyce. Nè yèyè mmupicile mu maalu manène kacya ku bwàna bwèndè, mwàkakèngelabi bwà yèyè kupàtukila mu dīkù dīvwà kadīyì dikuukwila Nzambi to nè bikwàbò. Ndi ngumvwila mwànà awu luse, mùvwàye nè cyà kukola mùshindù awu. Nènku mpindyewu, ùdi munkaci mwà kukèba Nyumà Mwìmpè, nè mmujilè byàkudyà mu mùshindù wà bīmukolela nè mwà kwimana kuulu, ùjila byàkudyà nè ùsambila bwà Nyumà Mwìmpè.

⁹ Mwakùnyàanyi wa bakàji, Delores, kwambayè nè: “Bill, ndi ànu. . . Pàvwà èkèleeziyà mwikàle—bukolè bwikàle mu èkèleeziyà apu,” yèyè nè: “Mvwa ndyùm vwa ànu bu nè mvwa mwà kubùuka kuya. Kàdi pashìishe, pàakabangà bantu bònsò—

Nyumà Mwîmpè kubanga kupwekela bantu,” yêyè nè, “mémè kusòmba ànu mwaba awu nè kukènzakana.” Nwamònu anyi? Èè, nwamònu’s, nènku lukonko alu lùdi kaaba aka dilòòlò edi, pa bwalu abu. Ke mémè kudyàmbidila nè pàmwàpa aci ncifwànyine kwambulwisha èkèleeziyà bwà—bwà kwakidila. Nènku mpindyewu, ncyèna muswè kwangata disangisha dyà milòmbò dyà mu diisátù dilòòlò bwà kudibwayisha mu cintu cyà mùshindù awu to, kàdi ndi—ndi muswè kwikala mutwishiibwe nè èkèleeziyà ùdi ùmvwa maalu aa kantu nè kantu (nudi numòna anyi?), kumpàlà kwà. . .

¹⁰ Nènku mvwa ànu nyiikilangana nè ngàngàbukà kampàndà kaaba aka mu dyàlumingu, mwalùkìla lwà paanyimà pàà èkèleeziyà apa lwà mu—lwà paanyimà apa lwà mu ndekeelu mwà èkèleeziyà emu. Yêyè ùvwa ngàngàbukà wa maalu à dyondopangana. Úvwa mwendèshe màshinyi kuumukila ànu ku (mpenyi pàdi ciimamwèndè wa bukalenge cyà Assemblée de Dieu mpindyewu? Mu. . .) Ku Springfield, mu Missouri, bwà kubwela mu disangisha.

Kwambayè nè: “Mwanèètù Branham. . .” (Mpindyewu aci ncifùmine ku ciimamwèndè wa bukalenge cyà beena Assemblées.) Ke yêyè nè: “Matùkù àanyi ònsò à mwoyi mvwa ànu ndikonka bwà bwalu abu.” Yêyè nè: “Mmusangu wà kumpàlà wungàakashiindikiiwbà pa bwalu abu kacya bàndela.” Yêyè kwamba. . . Kutwilanganayè naanyi lwà paanyimà mu cibambalu amu, musòmbè, ngàngàbukà wa maalu à dyondopangana.

¹¹ Nè—nè pa nànkù, Mwanèètù Mercier nè Mwanèètù Gene Goad paanyimà apa nè bisanjì byà dikwàta naabi mikàbà yà mèyì. . . Ànu mpindyewu ewu, Mwanèètù Mercier wàmbi nè ùvwa mupeètè cyà citàmbe bwîmpè mu disangisha mutùvwà—mutùvwà bacyùmvwije bwà—bwà nè pàakabwelà Nyumà Mwîmpè mu disangisha nè—nè kuDìpandululaYè, nènku Nzambì munkaci mwà kuDyàbanya Yêyè mwinè munkaci mwà bantu Bèndè. . . Èè, aci’s ke cidìYe wènza menemene. Nè pashìishe, pàdi bantu bàà Nzambì bàbanga kudisangisha pàmwè, kùdi bwobùmwe, kùdi bukolè. Nwamònu anyi? Nè dìbà didì ànu bantu bàà Nzambì bàdisangisha pàmwè mu kaabujimà, ndi ngiitabuujà nè dibìishiibwa dyà ku lufù nedyènzeke dìbà adi. Nèkwikalè cikondo cyà dyambwibwa pààbangà Nyumà Mwîmpè kubàsangisha. Bòbò—neikalè mu banyààbanya, mu bushùwà bwà bwalu, kàdi nekwikalè didìsanga dinène.

¹² Mpindyewu, tulùlù twà disambila tùdi tutùmìibwe etu, *Dìyì dyà Dyondopa*. . . Ndi ànu dyàkàmwe, ku ditùkù dyà kumpàlà dyà cidimu, bu Mukalenge mwà kwanyisha, nènye—nènye mu Kingston, mu Jamaïque, kubwela mu Haïti, nè kuumukila aku. . . Mfùmù wa—wa ditùnga dyà Haïti mmuntùmine dibìikidiibwa, nè—nè mpùlushì yàbò yònsò ayi bwà dikùbiibwa. Bàdi munkaci mwà dibìnduluka dyà bantu kuntwaku. Nènku

cìdici, yéyè mmuswè bwà twètù kulwa nè mudimu wà bwambi wà mùshindù ewu ewu, ùvwàye muumvwe nè ùvwa mu—mu San Juan cidimu cishààle eci patùvwàku. Kwambayè nè wàkadyàmbidila nè ke cintu cimwèpelè cìvwà mwà kusungila ditunga dyèndè. Nwamònu anyi?

¹³ Mpindyewu, bu mèmè nè mulundà mwena Kàtòlikè musòmbe kaaba aka, ncyèna ngàmbe eci bwà—bwà kukupenda anyi cintu kampàndà to; ncyèna ncyàmbe mu mùshindù awu to. Kàdi èkèleeziyà wa Kàtòlikè ùdi ùteeta bwà kwangata Haïti ku bukòokeshi (nwamònu anyi?); nènkù cintu cimwèpelè cyàmusungilà, neciikalè ditàbuluja dyà dinyùkusha, dyà cyena Mishònyì mpindyewu mene. Nwamònu anyi? Nènkù bìvwa bilenga byà kacya, nè ndi ncyànyisha. Nènkù ke mèmè kumwambila nè, mu lumingu lwà Noël nè ndambù wa matùkù àdi àlondà mpindyewu aa, paanyimà pàà mààlabà, netùditwèku mu dijila dyà byàkudya nè kusambila, nè kumòna nè mùshindù kaayi wàtùlombolà Mukalenge awu.

¹⁴ Pashiishe Àmèrikè wa ku Sud...Nè pashiishe, ndi mudyùmvwè mulombòdiibwe ànu menemene bwà kuya ku—ku Norvège. Ndi mulombodiibwe ànu menemene bwà kuyiilamù ku Norvège cidimu eci, nè pashiishe, ku Àfrikè kàbidi. Nènkù eci cìdi—neciikalè mwà kukòshiiibwa mu tukàbà tukesè nè kutùmiibwa mu Àfrikè kumpàlà kwà disangisha adi. Aci's ke búngi bwà bantu. . . Nudi mwà kupetaku nànsha cingènyingenyi cyanàànà cyà búngi bwà bantu bàdi munkaci mwà kubiikila bwà tulùlù twà disambila mpindyewu pàdibo bùùmvwà nè udi ulwa kuntwaku, nwamònu's, bàdi ànu bàbwela—bàbwela mu dipetangana kàbidi. Nènkù etu ntulùlù tukesè tùdi tukòsolola kàbidi nè tumana kulongolola bwà kutùmiibwa kùdi—kùdi bantu bashiilàngàne.

¹⁵ Pa nànkù bònsò pàmwè nè Èkèleeziyà munène wa Nzambi udi nè Mwoyi ewu, twìnyikàayi mitù yetù bwà katanci kakesè cyanàànà mpindyewu. Nènkù muntu nè muntu wa kunùdi mu mùshindù wèbè sungasunga, sambilaayi bwà Nzambi àlaabè tulùlù etu. Mpindyewu, dyàmbedi ndi ntèela Mufundu nè: “Ku mubidi wà Pòlò bàvwa bàngata mishwàlà anyi tulùlù, nè bàyitèeka pa babèedi, nènkù nyumà mibi yìvwa yipàtuka munda mwà bantu, nè ntàtù; nè bàvwa bòndopiibwa.”

¹⁶ Mukalenge, pa cyambilu cikesè eci cìdi citèeka apa munda mwà bidimu byònsò ebi, nè mùshindù wùdi Wèwè mutàmbe kutùbènesha's, nè—nè mùdi Èvànjeeliyò mutungùnùke ànu nè kupicila pa cyòci eci, nè. . . Bu cyambilu cikesè eci mwà kwikala ànu nè mèsù anyi cifwànyine kwakula, s'civwa cifwànyine kulonda bwà nkàmà yà bishimà binène bikaadi byenjiibwe ànu kumpàlà kwàci eku: bacibùkile panshì, balèmà, mpofo, bakunya kùdi kànsèrè. Nè makolè à Nzambi udi nè Mwoyi mmamanyishiiibwe mu nzùbu mukesè ewu. Nènkù Taatù Nzambi, tudì ànu tuKusàkidila bwà bintu byònsò ebi.

¹⁷ Nènku mpindyewu, èkèleeziyà mmudisangishe pàmwè dilòlò edi bwà kuKukuukwila. Tudi balwè bwà—bwà kwandamuna ku nkonko yidìbo beelè eyi. Bwalu mbwà meeji matòoke nè myoyi yà bantu yidì bintu ebi bìbapanda mitù mu meeji àbò. Nènku Mukalenge, tudi tufika ku dimanya nè, kòkò cintu kampàndà cyà citùpanda mitù, katwèna mwà kwikala nè diitabuuja to, pàcidìku ànu lukonko. Pa nàнку katwèna baswè nkonko nànsha mikesè to.

¹⁸ Mukalenge, tudi tumòna dijinga dyà dibàtiiza dyà Nyumà Mwimpè munkaci mwà bantu bèètù nè munkaci mwà èkèleeziyà ewu. Nè katwèna—katwèna baswè nkonko nànsha mikesè mu mitù yàbò to. Tudi baswè bwà byònsò bitòokeshiibwè, bwà bààmònakù mwà kumanya cidiYe pààlwàYe, nè kumanya nè Ùdi bwàbò bòbò.

¹⁹ Nè pashiishe, dyàmwàmwà dyà mbù adi, lwà mwàmwa mu bisuku nè meetu byà mîdimà mùdi ngoma munkaci mwà kutuuta amu, nè beena nsudi balàadika eku nè eku kònsò mu—mwînshì mwà mici, nè njiiji munkaci mwà kubùuka, nè—nè mikòlò yàbò mikòsa nè maci àbò makunya ònsò nè kwìsù kwònsò kukunya, kùdi nsudì. Cimpèpèmpè cibì aci, Mukalenge, mu mùshindù wà nè mbikolè mwà kuseemena naabò pabwìpi mu ntàntà wa nzùbu mikesè. Nè bàna bakesè bakwàte nè byà luse kabàyi nè byàkudya, kabàyi nè bilàmbà. . . Kàdi's mbannange, Mukalenge. Nè bòbò—bòbò mbiitabùùje mudimu wà bwambi, paanyimà pàà Bukolè bwà Nzambi udi nè Mwoyi bumanè kwondopa bààbùngì bàà kùdìbo. Nè ncitukù mupetè diikisha mu nyumà wanyi to kacya ànu ku ditùkù dîngààkashiyanganà nè Àfrikè adi, mumanye nè bantu bapèle, bakèngeledi abu bàdi mu ngiikàdilù wa wènzà bwòwà kuntwaku, nè biikàdile nè mwoyi mu ngiikàdilù yà majimbù. Nènku mpàkààmàngà awu, mwikale nè mifùbà yà bantu ùyitùutakaja mu minu yèndè, nè ùsòka nyumà mibi, nènku kaa, mwaba kaayipu—kaayipu's wè, nè pashiishe bwà kwela meeji nè, munwemu mu Àmèrikè, mùdi èkèleeziyà milenga kumòna nè myaba minène. Nènku, Nzambi, nè pa kumanya nè bantu bàdi benza nè byà luse abu bàdi mu lukèngelu lwà menemene, kubàmòna bàlwa mu disangisha, bàtèntàmàngà muntu nè mukwèndè, nè bààbùngì bàà kùdìbo bàfwa balàadika mwaba awu, bàteeta ànu bwà kuumwva ndambù wa mèyi à kùdi muntu kampàndà udibò bambè nè mmuKumanyè. Myoyi yàbò mmibange kujuuka, Mukalenge, kacya ànu Mukenji nè mikàndà mifùndilangana yidì munkaci mwà kuya eku nè eku mu Àfrikè patùdi twakulangana apa. Tupya, mùdidi bimwèka, ntubangè kuteemeshiibwa kàbìdi.

²⁰ Nènku èkèleeziyà Webè munène mwaba awu, uvwa èkèleeziyà wa bukolè awu, musùnsùluka mu tupese, kaa Nzambi, nè mutàpuluka mutàmbe kuya ku mmwènenenu yà kwìsùkwìsù, nè—nè bakwàbò bacìikàle ànu bàteeta bwà kushàala bakwàte ku Bulelèlè nè Nyumà. Nènku mpindyewu,

binunu bàdi munkaci mwà kulomba mpindyewu; bàdi dijinga nè tulùlù twà disambila ànu nè lùkàsà lwónsò tündi—tündi musambidile atu. Mu túbòmbì tukesè emu mùdi—mùdi malòmbà à masambila, à tubùki tukesè tuyaaya kùdi bàdi mu lukengelu lwà bintu. Kaa, Nzambi wa mu Dyulu wàkenza maułu nè buloba awu, ndi nkułòmba, Mukalenge, mu Dìna dyà Yesù bwà Wèwè kujidila kantu nè kantu kàà ku cilàmbà eci. Nènku swàkù bwà Nyumà Mwimpè Webè àye nè kantu nè kantu kònsò kàà cyòci aci, Mukalenge. Nè piikalàtu mwà kutèekiibwa pa babèedi nè beena ntàtu, swàkù bwà nyumà mibi yibùmukè.

²¹ Pàndi ngèèla meeji mu bisuku nè meetu mwàmwa mwikalà bintu ebi mwà kuya, bààbùngì bàà kùdìbo, pàdìbo apu—bàdi mene bàkuukwila dyabùlù. Ndi ndòmba, Nzambi, bwà kiikadikù nè mwaba nànsha wùmwe wà kwimanyina to, bwà yèyè ùmukè mu bitùùdilù, nè bantu bàlwe ku dimanya dyà Mukalenge Yesù. Enzàku nànkù, Mukalenge. Swàkù bwà mabèedi àbò òndopiibwè, ntàtu yàbò yìlongolodiibwè, nè misùukà yàbò yìsungidiibwè, nè Bukolè bwà Nzsambi bütambè byònsò. Enzàku nànkù, Taatù. Tudi tutùma kantu nè kantu kàà cilàmbà eci bu cintu cìmwèpelè. Ndimi yàbùngì yà kapyà yìdi munda emu dilòòlò edi, Mukalenge, nè bònsò pàmwe tudi tutùma masambila ètù Kùdi bwà cyòci eci, bwà muntu nè muntu wacitentekelabò awu òndopiibwe. Mu Dìna dyà Yesù Kilistò. Amen.

²² Mpindyewu, nudi mwà kungumvwa lwà paanyimà apu, bimpè menemene paanyimà apu mpindyewu dilòòlò edi anyi? Abi's mbimpè. Ngèèla meeji nè netwikalè nè disànkà divùle patwàpetà èkèleeziyà mukwàbò kaaba aka, bwalu tuntu tukesè etu tùdi kacya twàlamata panshi etu, tùdi túsunsulula òyì dyèbè nè udi—udi upanga nè mwà kuditàèleja mene.

²³ Mpindyewu, ndi mfika ku dyumvwa cyàkàbìdi dilòòlò edi nè, ndi—ndi ngènda nseemena ku malaba. . . Mwanèètù Wood, kumpalà kwà mèmè kucìpwa mwoyi, Ndi nè mùshwàlà awu. Kùvwakù mumpèèshe mùshwàlà bwà muntu kampàndà anyi? Anyi wùvwa ng'wèwè anyi? Muntu kampàndà mmumpèèshe mùshwàlà wà kwela mu mpaaya bwà kulama, nè kubangila ànu piine apu ndi naawù, mu cikondo cyònsò cyà disangisha amu. Ncyèna mumanyè nè ùvwa nganyi to. Mvwa ndyàmbidila nè ùvwa ngwèwè uvwa mwàmbè nè: “Lamàkù eci mu mpaaya mwèbè amu bwà muntu kampànda.” Bàmwe. . . [Mwanèètù Neville ùdi wàkula nè Mwanèètù Branham—Muf.] Bìvwa nànkù anyi? Mwanèètù Jackson, uvwa nè mùshwàlà bwà muntu kampàndà anyi? Ke wòwù ewu's. Èyo. Ewu. . . Èyowà's, mukalenge. Èè, ewu newikale ànu kaaba aka mene, Mwanèètù Jackson, bu wèwè mwà kuwùjinga. Nènku mpindyewu, ndi mumanyè nè muntu kampàndà ùvwa muwumpèèshe, wamba nè: “Ùlamèku mu mpaaya mwèbè amu.” Nè pashìishe, mèmè kuwùtèeka mu nkooci wanyì kàdi kuwùpwa mwoyi.

²⁴ Mpindyewu, bwà. . . Mpindyewu, bu Mukalenge mwà

kwanyisha, nè dīyī dyànyī diikàlè bīmpè, anyī mu dyàlumingu mu dindà anyī mu dyàlumingu dilòòlò, òm̀wè, bu Mukalenge mwà kwanyisha, ndi muswè kwakula pa diyīsha dyà Noël dīndī naadi bwènù nwènù: *Ci—Cimanyīnu Cīdī Kaciyī Cīpangila*. Nudi numòna anyī? Ncīdī ànu nè. . . Ndi mucilengè mu dyàlumingu mu dindà, kàdī pashīshe, cintu kampàndà kuteemeshaci kapyà mu mwoyī wànyī. Nènku nkaavwa ànu mutàmbe kuya ntàntà mule nè diyīsha bwà kucyàngata cyàkàbīdī. Pa nàнку ndi—ndi muswè kucyàngata mu dyàlumingu mu dindà, bu Mukalenge mwà kwanyisha, anyī mu dyàlumingu dilòòlò, dindà anyī dilòòlò. Pa nàнку Mwanèètù Neville nè mèmè netùumvwanganè bwà dībà adi.

²⁵ Mpindyewu, ànu bu mwàmbī Mwanèètù Neville, ki m̀ndī pàànyī muswè kusàkidila muntu nè muntu wa kunùdī bwà divùluka dyà Noël, twartà twènù. Mwanèètù wa balùme nè Mwanèètù wa bakàjī Spencer, ndi mupetè twènù. Nè bakwàbò bònsò bashīlèshīlàngàne kaaba aka bàvwa bantùmine twartà twènù, myaba yònsò, ndi mbyànyisha nè mapà nè bikwàbò twènùdī batùme abi. Ncyà bushùwà nè tudi tubyànyisha. Dyanyisha dyà kùdī—dyà kùdī mukàjàànyī, nè mèmè, nè—twètù—nè bānà, tudi tunwèla twasàkidila. Tudi baswè bwà kwikala bakòòkèshe bwà kutùmina muntu nè muntu ditàpishī dyà Noël, kàdī ncyà bushùwà nè aci ncīfwànyīne kwikala cintu cikolè bwà muyīshi kwenzayè, kī mmwòmò anyī? Èè, pàmwàpa bwà búngī bwà bàvwa ne cyà kutùpeta, ncyèna ànu mwà kukùmbana bwà kucyènzà nànsa. Nudi numòna anyī? Ndi ànu. . . Kàdī mwà kujinga nè ngàpetelakù nànsa bānà, mwānà nè mwānà yònsò, cintu kampàndà. Ncyà bushùwà nè mwā mwà kuswa kucyènzà, kàdī kaciyèna ànu. . . Bambi kabèèna mwà kwenza nàнку to. Nwamònu anyī? Kùdī ànu bipitèpīte búngī byà kuya kasùmba. Kàdī tudi bònsò, ndi mutwīshīibwè, mèmè mwinè nè bakwàbò kàbīdī, nè tudi twanyisha masangisha ètù. Cīm̀wè cyà ku bintu byà bitàmbe bunène bīndī mèmè ngèèla meeji nè mbinùdī benzè, ndinanga dyènù nè diitabuuja dyènù didī kadiyī difwa dinùdī bateèke mu mèmè bu wenù—bu umwe wa ku bampaasàtā bèènù mwab’ewu, nè—cidimu eci.

²⁶ Mwanèètù Neville, aci’s cīdī bwèbè wèwè pèèbè, mwanèètù munanga. Nè nyumà mulenga utu Mwanèètù Neville ùleeja misangu yònsò awu, bu mùdī nè: “Lwàkù buludi k̀nu, Mwanèètù Branham; cyambilu ncyòci eci, cyàngatè ànu buludī. Nzambi àbèneshīibwè, mèmè ntu muswè kusòmbe bwà kutèèleja.” Nè ntu—ntu munange aci. Ntu ànu munange mùshindù mupwèkèle, wa kawùyi wà citù wùtù naawù Mwanèètù Neville awu.

²⁷ Nè diitabuuja dyènù bwònsò adi, nè ànu. . . Cintu cīm̀wèpelè cinùdīku mwà kungenzela, nkunsambidila. Mpindyewu, nèngīkale nè mushikī wà masangisha à mu pale nè peepī kumpàlà mene kwà njila mule menemene wa lwendu awu

kutwàdija. Mpindyewu, neà—neàtèèkiibwè eku nè eku, ngèèla meeji, lwà ku Glasgow, mu Kentucky, nêngènzèmu dilòòlò dimwè. Pàmwàpa ku Campbellsville, mu Kentucky, nêngiikalè nè dilòòlò dimwè. Nè—nè lwà ku mwaba kampàndà mukwàbò kuntwaku mu Kentucky, mu Willow Shade, ngèèla meeji nè mmwômò, ndi nè dilòòlò dimwè. Bwalu... Ànu njila mujimà awu, nênnùmanyishe pàndi ànu mmana kuàlongolola, masangisha àlwalwà awu, ikalà ànu masangisha makesè à pale nè peepi mpindyewu, too nè pàngàalukilà cyàkàbidì mu budimi bwà bwambi.

²⁸ Kàdi ndi mufùme ku didilàmbula mèmè mwinè cyàkàbidì nè mu mùshindù mupyamùpyà dilòòlò adi kùdi Nzambi. Nè ku dikwàcisha dyà Nzambi nè ku ngàsà wa Nzambi ndi muswè kushààla mu cikòòkedi too nè pàngààfwà. Nwamònu anyi? Ngakenza aci kùkaadi bidimu bitwè ku makùmi àsàtù. Nè nkaavwamù... Kàdi ndi ndyùm vwa mucyòke misangu mikwàbò, mupangè nè mwà kucyòka. Ndi nkafika ànu mu mùshindù wà nciciyi mwà kuya kàbidì kule to. Nwamònu's, nwènu bònso nudi nucimòna ànu kakesè kaaba aka. Kanwèna—kanwèna ànu bamanyè cìdici kuulu kwàka, nè pambèlù pààpa, nè lwà apa nùnkù to. Nè—nè kî nnànsha cimenga cìmwè—cimenga cìmwè to, to; province umwe, to; kî mmu Ètats-Unis to; kàdi mpa buloba (nwamònu anyi?), pa buloba bujimà. Nwamònu anyi? Nènku aci—aci's bàdi bààbúngi, ngèèla meeji, mu dipetangana dilòòlò edi, ndi mutwilàngàne anyi mu dipetangana, kî mmu binunu to, kàdi mu miliyò yà bantu. Nwamònu anyi? Nènku nenùshitukè ànu bwà búngi bwà bàdi bàsaama mu bwòbò abu. Nwamònu anyi? Nènku bàdi bàbùikila; nè cidi cyènza dicìncimikiibwa dinène.

²⁹ Pa nànkù ndi ngàanyisha masambila ènù bwònsò. Nè ku dikwàcisha dyà Nzambi nè ngàsà, Noël wa Disànka kùdi muntu nè muntu wa kunùdì. Vùlukaàyi dìyi dyànyì nè, ewu kî n'Taatù Noël to, eci mbwà Yesù. Nudi numòna anyi? *Noël* mbwena kwamba nè "Kilistò." Nènku tuvwa twenda tunyunguluka nè màshinyi makèèlèlè dilòòlò, twenda tuleeja bàna nzùbu yònsò milengeja bímpè aye nè bintu byònsò, bidì bilenga byà mpàci. Kàdi mèmè kudyàmbidila nè, bu mèmè pa—cintu kanà cyònsò pa nzùbù wanyì, cìmwàkù mwà kuswà kufùnda, ncimanyinu cyà bukènkè nè: *Mutwishùbwe nè Kilistò Neikalè Mu Noël Wenù*. Ncyà bushùwà. Alùjà Kilistò mu Noël.

³⁰ Mpindyewu, Taatù Nzambi, nyèwù tukàadi tulenga nkonko mpindyewu. Tudi tulwa nè meeji matòòke ònsò, ònsò à menemene. Nè—nè bantu bàà musinga mukolè aba, Mukalenge, mbèle nkonko eyi nènku—ke cidi pa myoyi yàbò, nè pàmwàpa bààbúngi bakwàbò mu nzùbu emu; nè bàdi bàjinga ànu kumanya cyà dyenza. Nènku Taatù, mèmè—mèmè ndi mupinganyi wà mukwàte nè byà luse Webè, kàdi ndi ndòmba bwà Ùngambùlwishèku bwà kumanya Dìyi Dyèbè, bwà Dyàtwàlakù

citùpà cyà cisankisha ku dínà lukonko lwónsò. Dìbà adi eci tudi tushiya mu byanza Byèbè, nè mu Dínà Dyèbè mmutùdi tulòmba nùnkù. Amen.

³¹ Mpindyewu, lukonko lwà Mwanèètù Pat ewu's ndwà lwîmpè be, lwà dikèma. Ndi mufwànyine ànu kubanga pa lólù alu, Mwanèètù Pat. Mpindyewu, yónsò wa kunùdi yéyè nè lukonko, ùlùfunde ànu cyanàànà ùlùtèèkè kaaba aka, anyi—anyi Mwanèètù Pat neàkutwàdilé citùpà cyà dibèji pawikala kùyì nè citùpà cyà dibèji to; anyi nêngiikalè ànu nè disànkà dyà kwenza mwànyì pàànyì mwónsò mùndìku bwà kwandamuna amu.

Mpindyewu, elu's ndukonko ànu lwà menemene, Mwanèètù Pat. Elu lùdi lùmvwika nè lùdi nè mmwènekèlu wa wùnèka, kàdi's ndukonko.

101. Nyumà yàkabwela mu ngulube ayi yidi penyì mpindyewu? Nyumà yàkabwela mu cisumbù cyà ngulube mu ditùkù adi pààkayipata Yesù mu mutombòke ayi yidi penyì?

³² Èè, Mwanèètù Pat, ku dyànyì pàànyì dimanya... Mpindyewu, tudi tubangila pa dilonga dyà badémóns bwà kubanga naadi. Mpindyewu, dilonga dyà badémóns ncintu cinène. (Mpindyewu, bàmwè bàà kunùdi tàngilàayi ntankù nè kanùndekèdìku nya ntàntà mupitèpite bule pa lukonko lùmwè to.) Kàdi makolè à démon awu, nyumà ayi yivwa munda mwà muntu uvwa ubiikidiibwa nè Legònà dyàmbedi. Kì mmwòmò anyi? Nènku bwalu dínà dyèndè ùvwa Musumbà, bwalu *Legònà* mu cyena Ebèlù mbwena kwamba nè “bààbúngì.” Nwamònu anyi? Yìvwakù yàbúngì be.

³³ Nènku nyumà ayi yivwà mu muntu munanga awu yivwa mimuvwijè mubùlùke. Nènku piikalàku muntu ùkaadikù mumòne muntu mubùlùke anyi mukùngàmàngàne nendè, bàdi nè dikàndà dyàbò—dyàbò—dyàbò adi divudija misangu yàbúngì, bwalu mbakwàta bikolè kùdi dyabùlù. Piikalàbi nè ukàadikù kacya museemène pabwìpì nè—nè muntu mujìmije lungènyì, oh, bidi bìkèngela bwà bantu bìmpè bààbúngì kumukwàtabò. Nènku ùdi nè bukolè bwèndè abu misangu yibìdi anyi yisàtù.

³⁴ Mpindyewu, pàdi muntu kampàndà mucibùlùkile panshi kàdi Nyumà Mwîmpè ùdi ùmukwàta, piikalà dyabùlù nè bukolè bwà bwena abu bwà kuvwija muntu misangu nè dikàndà dyèndè dyà buntu adi yisàtù anyi yinaayi, mbukolè búngì kaayi bùdi Nzambì mwà kutèèka mu muntu's? Nwamònu anyi? Ke cidì cilwa pambidi pèndè bwà kumufikisha ku dyenda mu dikàndà dyà Nzambì, mwaba ùvwaye mulàadika mucibùlùkile panshi munda mwà bidimu. Mifùbà yèndè yidi yòloloka buludi; nè byanza byèndè byòloloka; ùdi wènda, ànu bu nsongàalùmè mupyamùpyà, bwalu bukolè bwà Nyumà Mwîmpè bùdi pambidi pèndè.

³⁵ Mpindyewu, eyi yivwa mitàmbe kubìpa mu mùshindù wà bàjìngila muntu awu mu nkànu, nè yéyè ùvwa mwà kuyicibula.

Nènku bàdi bàmba nè ùvwa ùyicibulula. Nènku kakùywa—kakùvwa cintu nànsha címwè cívwa mwà kumuswika to. Ùvwa bulelèlà mu bwalu bubì be, bwalu wàkadì nè musùmbà mujimà wà badémóns munda mwèndè. Nè pashìishe, pàvwàye. . . Yesù wàkasabuka dyàmwàmwa nè kubwela mu Gadara nè kubanga kupweka mu nkità. . . Nè yèyè ùvwa mubì bikolè, kí mmuntu awu to (nwamònu anyi?), muntu awu ùvwa bìmpè.

³⁶ Kí mmuntu awu to. Paùdi umòna muntu wa mùshindù awu, kanwèdikù meeji nè mmuntu awu to; ndyabùlù udi munda mwà muntu awu.

Mpindyewu, mubùlùke wa pa cibùmbà cyà ku cyambilu awu dilòòlò adi, ùvwa nè cyà kunshebeya, mu Oregon mwàmwa. Muntu awu, ndi—pàakalwàye kùndì, pamutù pàà. . . pèèndè muntwila matè mwìsù nè mumbiikila nè “nyòka mu mashinde” kumpàlà kwà bantu batwè ku binunu dikùmi, èè, kacìvwa, kàvwa muntu awu to. Yèyè mmuntu udi udyà, ùnwa, ulààla, pàmwàpa mwikàle nè dikhù, nè munange, nè—nè ànu mùndì emu anyi múdi amu. Kàdi cívwa ndémón awu munda mwèndè uvwa wenza cyòci aci awu. Nwamònu anyi?

³⁷ Nènku kashidi kwèna mwà kwipata dyabùlù ku cilunji cibì nànsha. Bìdi bikèngela dinanga bwà kwenza nànkù. Nè dinanga ke bukolè butàmbe bukolè bùdiku pa buloba. Mpindyewu, bu nwènú mwà kumòna, démon ùtu misangu yònsò ànu lukínu. Lukínu ndwà dyabùlù. Nè pàdi bantu bàkina muntu kampàndà, nwàvùlukaayi nè, ndémón wa wènzà bwòwa bwà kupeetula anyi kukina. Kanwèna nè cyà kwenza nànkù to.

³⁸ Nudi bavùlùke nè ci—ci. . . Yesù wàkamba mu diyishi Dyèndè nè panùdi nusambila nè: “Taatù wetù Udi mu Dyulu,”. . . Nènku pàakapwekàYe kwìnshì aku, Wàkamba nè: “Wèwè kùyì mufwile muntu yònsò ewu luse ku matomboka èndè byà bifùmìna mu mwoyi wèbè to, nànsha Taatù wèbè wa mu Dyulu kèna ùkufwila luse ku matomboka èbè to.” Nwamònu anyi? Kwèna nè cyà kwenza nànkù to.

³⁹ Kàdi mpindyewu, mwaba wùdi dyabùlù ùfùkila bukolè bwà lukínu (nwamònu anyi?) bwà kupàtuka lùbilu pa cibùmbà cyà ku cyambilu bwà kunshipa, cìdì bwà mu mubidi emu, yèyè ùvwa mutàmbe nè bukolè, misangu yàbùngì mitàmbe. . . Ùvwa mwà kwikala mungambùle mungelè muulu, pàmwàpa, nè minu yèndè yìbìdì, kungambwila ànu ku mukàbà mùshindù awu, bwalu yèyè ùvwa nè bujitu bwà kilos lukàmà nè dikùmi nè mwandamukùlù anyi lukàmà nè makùmi àbìdì nè yìbìdì; ùvwa nè bule bupite pa metèlè àbìdì anyi àbìdì nè byà mu njila, muntu munène wa mfyondo. Nènku ànu. . . Ùvwa ùfùma ku dituuta muyiishi kampàndà cisùsu kwìnshì kwa mùsèèsù, mumucibùle mufùbà wà lukànù lwà nshìngù nè lubàngà, nè kumutàpa, nè kumwelesha mu lùpitàadi. Ùvwa ànu mukine bayiishi.

Nè pashiishe, wàkabànda ànu mwaba awu bwà kunshipa. Nwamònu anyi?

⁴⁰ Mpindyewu, mu muntu awu mùvwa yimwè yà ku nyumà yàkiipaciibwa mu cisumbù cyà ngulube eyi. Bámwè bàà ku bantu bàdi bènza nè byà luse abu bàdi kuntweku mu lùpitaadi lwà babùlùke, munkaci mwà kudituuta mitù ku milonda mivungila bintu, ya mu bibambalu abi. Nwàvùlukaayi nè, démons kayitu yifwa nànsha. Démons yôyi yitu misangu yônsò ànu nè mwoyi, kàdi nekùlwe cikondo ciikalà démons nè cyà kufwà. Neyibùtudiibwe butubutu. Kàdi mpindyewu, yidi nè mwoyi, nè yidi yikwàta mudimu pa bantu ku lukòngò nè ku lukòngo. Yimwè yà ku yôyi yidi mu mmwènekeli wa kànsêrè; yimwè yidi mu mmwènekeli wa ciseki; yimwè yidi mu mmwènekeli wa disaamà dyà cyâdi. Yidi yibwela mu mubidi, kàdi mùdibi bimwèka, kayèna nè bukòlè to pàdiyi kayiyi mibwele mu muntu kampànda. Bikèngela bwà kukwàcilàyi mudimu mu muntu kampànda, cidi citùfikisha ku meeji makwàbò, à nè Nyumà Mwimpè ùdi—ùdi ùbwikila buloba bujimà, kàdi Ùdi wamba kupanga cyà dyanza pàdiYe kàyi mubwele munda mwèbè nè mwànyi.

⁴¹ Nzambi mmukweyèmène wèwè nè mèmè. Nwamònu anyi? Nyumà Mwimpè. . . Buloba mbùle tètè nè Nyumà wa Nzambi, kàdi mMupòngolola. Kàdi Yèyè—Yèyè kèna mwà kukwàta mudimu pàdiYe kàyi mubwele munda mwètù to, twètù bantu, bwà kukwàta mudimu.

⁴² Nènkù dyabùlù mmuswè kutùkòòkesha bwà twètù kukwàta mudimu ku bwenzeji bwèndè. Nànkù pàdiye ùpeta mmwènekeli mubwengètèke, ùdi ùbweja mpèkaatù. Yèyè mwà kumulamina ànu mu muntu mwakàne, muntu mwimpè, kàdi kumulekela ànu ùtúngunuka nè kuteeta bwà kwikala mwimpè mùshindù awu; bu yèyè mwà kumulamina mùshindù awu too nè pàdiye ùfwa, ke cidiye muswè kwenza aci's. Yèyè's mmumanè kumupyà, bwalu nànsha wèwè mwakàne wa bishi, nànsha wèwè mwimpè wa bishi, nànsha wèwè wa maalù malenga à bishi, nànsha wèwè mwikàle mukezùke wa bishi, nànsha wèwè nè meeji matòòke à bishi, kwàdyakufikakù mu Dyulu paùdi kùyi mulediibwe cyàkàbidì to. Yesù ngudi mwámbe nànkù. Pa nànkù kakwèna. . . Cidi. . . Bikèngela ùlediibwè, bikèngela ùfukuludiibwè, cyanààna kakwènakù mùshindù nànsha wùmwe pa buloba wà wèwè kubwela mu Dyulu, anyi mene—anyi mene kulwa kùdi Kilistò to.

⁴³ Mpindyewu, ngàmbi kùkaadi katanci, cidi mwà kujuula mu ngeelèlù wenù wa meeji lukonko lukwàbò, nè ndi—nè ndi mulongèshe, nè aci cidi pa—pa. . . Bwà nè ncyèna ngiitabuujà nè kùdi cyà cyendèlèlè. . . Ncyèna ngiitabuujà nè Bible ùdi ùlongesha ifèrnò wa cyendèlèlè, wa ùlákuka kapyà awu to. Kabyèna nànkù to, bwalu byòbì nè ifèrnò ngwa cyendèlèlè nènkù bantu biikala mwà kuyamù nebànyookiibwè cyendèlèlè,

mùshindù wùmwèpelè wùvwàbokù mwà kunyookiibwa bwà cyendèlèlè, bìvwa bikèngela kwikalabò nè Mwoyi wà Cyendèlèlè. Kàdi kùdi mùshindù ànu wùmwèpelè wà Mwoyi wà Cyendèlèlè, nè mwinè awu mmu Nzambì. Nwamònu anyi? Pa nàнку bikèngela bàlwe ku dibùtudiibwa (nwamònu anyi?); mbwena kwamba nè, citùpà cyàbò cyà mubidi aci cibùtudiibwa, nè pashiishe citùpà cyàbò cyà nyumà cibùtudiibwa. Mbwena kwamba nè cyoshèke cibùtùke cyònsò nkòòng; kakwèna cikwàbò cintukù to. “Ní mmuji anyi ditàmbà,” mùdi Bible ùcibìikila. Bwàbò mbujike ànu nememene bwònsò nkòòng.

⁴⁴ Nè pashiishe, ndi mwà kujaadika nè kùdi milongo yà bantu mu Dyulu, bwà nè kabààkwikala bònsò mwomùmwe to, kàdi nenwikalè nè Mwoyi wà Cyendèlèlè wà mwomùmwe. Kàdi Bible mmwambè nè bamfùmù bàà pa buloba bàdi bàtwàla luumù lwàbò nè butùmbi (Bwàkabuulwibwà 22)—bàtwàla luumù lwàbò nè butùmbi mu cimenga aci. Aci cidì cijaadika nè nekwikalè bamfùmù mu buloba bupyabùpà, bamfùmù nè bakòòkeshi. Yesù wàkambila bayiidi Bèndè. . . Kwambabò nè: “Citwikalà mwà kupeta ncinyi paanyimà pàà twètù bamanè kushiyà taatù, nè maamù, nè byònsò bwà kuKulonda?”

⁴⁵ Yèyè kwamba nè: “Bulelèlè, Ndi nzwàmbila nè, nenùsòmbe pa nkwasà yà butùmbi dikùmi nè yìbìdì, nulumbulwisha bisàmbà dikùmi nè bìbìdì byà Izalèlèlè mu ditukù adi.” Nwamònu’s, cidì nndongolwelu mukwàbò wa pa buloba udi ulwa wìkala—wìkala mutàmbe kutùmbuga bikolè kutàmba cintu kanà cyònsò. Mu yèyè awu kamwàkwikala mpèkaatù to, kàdi nànsha nàнку nemwikalè balombodi nè bikwàbò mu bimenga, piikalà bintu byònsò byènzeka mu mùshindù wà Mwoyi wà Cyendèlèlè.

⁴⁶ Kàdi beena lwonji nebànyookiibwè bwà mpèkaatù yàbò bilondèshile byenzedi bìdì byenjìibwe mu mubidi, nè pashiishe nebàbùtudiibwe bwònsò nkòòng nè mu kaabujimà. Mpindyewu, vùlukàayi ànu aci. Nwènu bàdi bàfunda bintu ebi, nwavùlukaayi aci.

⁴⁷ Nènku nteekàayi pa bujaadiki bwà cyòci aci nè, kùdi mùshindù ànu wùmwèpelè wà Mwoyi wà Cyendèlèlè, nè tudi twenda tukèbanganà nè cyòci aci; nè Nzambì nkàayèndè ngudi nè Mwoyi wà Cyendèlèlè.

Kakwènakù mìshindù yìbìdì yà Mwoyi wà Cyendèlèlè nànsha, Mwoyi wà Cyendèlèlè wùmwèpelè, nènkù ke cyònsò cidì nè mwoyi. Nènku vùlukàayi, nùfundè eci pa dibèji dyènu adi kàbìdì nè: Cyònsò cidì cyenjìibwe, cìvwà nè ntwàdijilu, cidì nè ndekeelu. Cyònsò cìvwà nè ntwàdijilu cidì nè ndekeelu, nè ànu cìvwà kaciyi nè ntwàdijilu aci kaciyèna nè ndekeelu to. Nènku kùdi cintu ànu cìmwèpelè citù kacya kaciyiku nè ntwàdijilu to, nè cyòci aci cìvwa n’Nzambì. Nènku ke mùshindù wùmwèpelè wùdiku mwà kubiika ku lufù mu dibìikà dyà

ku lufù adi, ngwà kwikala nè Mwoyi wà Cyendèlèlè awu munda mwèbè. Nwamònu anyi? Ke mùshindù wùmwèpelè wùdìku mwà kwalukila, nku cintu kampàndà cìvwà kaciyi nè ntwàdijilu. Nènku paùdì mupetè Nyumà Mwímpè, munda mwèbè mmusòmbèle Mwoyi wùdì kawùyìku mubangè nè kawùyìku mwà kwikala nè ndekeelu to; nè wèwè udi nè Mwoyi awu munda mwèbè, dîbà adi udi nè Mwoyi wà Cyendèlèlè nè nudi bàna bàà balùmè nè bàà bakàji bàà Nzambi. Nwamònu anyi? Nè wèwè kwèna mwà kufwà to ànu mùdì Nzambi kàyì mwà kufwà amu, bwalu udi citùpà cyà Nzambi.

⁴⁸ Tudi nè lukonko kaaba aka kwènji katanci, mu mwaba kampàndà kaaba aka, lwà didyanjila-kulongolola, lùdì lùfikisha buludì ku cintu cìmwècìmwè aci. Udi ulwa citùpà cyà Nzambi; kàdi piikalà Nzambi muDìkòsòlòle mu Dikunji dinène dyà Kapyà adi, nè tuundimi tukesè atu kupàtukatù pa yònsò wa ku bantu abu, nè cìcìDi cyèza ànu cintu cìmwècìmwè aci leelù ewu. Tudi mwà kuciijaadikila ku dilabula ditùdì naadì, ku malongesha à Bible, ku bukèbikebi bwà maalu à mamanya, fòtò bwà kuleeja nè n'Cyòci aci, nè Nzambi ùdì ùDìpandulula munkaci mwà bantu Bèndè. “Nènku bwalu Mémè ndi nè mwoyi, nwènù pèènu nudi nè mwoyi,” mwàkambà Yesù. Katwèna mwà kufwà to. Cintu pààcì nè ndufù bwà mwena Kilistò kacitukù to; “Bwalu ewu udi ungiitabuujà Mémè, nànsha byòbì nè mmufwè, kàdi nèikalè nè mwoyi: Nè ewu yònsò udi nè mwoyi nè ungiitabuujà Mémè kààdyàkufwàku to.” Nwamònu anyi?

⁴⁹ “Kufwà,” mwàkù *lufù* wùdì wùmwìjia nè “mutàpùlùke.” Mpindyewu, bwà mu mubidi emu, tudi tutàpuluka nè luseke lwètù lwà mubidi, bwalu aci cìcìdi ànu mpèkaatù, kàdi nyumà yètù nyà kùdì Nzambi yìdì kayiyi mwà kutàpuludiibwa nè Nzambi to, bwalu tudi citùpà cyà Nzambi. Tudi—tudi tutwàla. . . Tudi baaluja cyàkàbìdì mu meeji à Nzambi awu. Cyònsò cìdì Nzambi wènza cìdì cipwàngàne nè cyà cyendèlèlè. Nènku pààkapàtukà meeji mene à Nzambi bwà bukalenge bwà bantu bàvwà mwà kuMukuukwila abu, meeji mene awu ngàa cyendèlèlè. Nwamònu anyi? Kabèèna mwà kubùtuka kàbìdì to. Dìyì dyònsò dyà Nzambi ndyà Cyendèlèlè. Yesù wàkamba nè: “Maulu nè buloba nebijiminè, maulu nè buloba byònsò bìbìdì bìdì mwà kujìmina, kàdi méyì Àànyì kààdyàkujìminakù to.” Nwamònu anyi? Àdì à cyendèlèlèlè pàmwè nè Nzambi. Nè “Nwènù bashààle munda Mwànyì nè Dìyì Dyànyì munda mwènù. . .” Nwamònu anyi? Tudi tulwa citùpà cyà Dìyì Dyèndè, citùpà cyà Mwoyi Wèndè, bwalu tudi musunya wà ku musunya Wèndè, nè mufùbà wà ku mufùbà Wèndè, nè mwoyi wà ku Mwoyi Wèndè. Dîbà adi katwèna mwà kubùtuka to ànu mùdì Nzambi Yèyè mwìnè kàyì mwà kubùtuka amu. Ke cìdì Nyumà Mwímpè ncyòci aci.

⁵⁰ Mulumyànà mukesè mmuumùke mwab'ewu wa ku Géorgie, Mwanèètù Evans. Mmuyè myaba yònsò mu ditungà dijimà.

Nè yêyè awu mmutùùdi munène wa mfranga wa mulundà wanyì mwimpè, Oral Roberts; nènku yêyè—yêyè ùvwa ùtùùdila ndongamu yèndè yònsò yà ku ntèlèviziyô ayi mfrangà kuntwaku, nè bintu bikwàbò byàbùngi byàkènzàye abi. Kàdi kungambilayè ditùkù adi, kwambayè nè: “Mwanèètù Branham, mwawa muyè ku cilongelu cyà Mwanèètù Jagger. Mwawa muyè myaba yònsò; Mémè kushààla kuntwaku munda mwà ngondo yisàtù. Mwawa munkaci mwà kulemba nyama; mémè kuya mu myaba ayi, wònsò wà ku yôyi, nè kumwaluja ku cintu cimwècimwè aci. Ncivwakù mwà kufika mwaba wùmvwàku nè ditwishiihwa nànsha òmwè to (nudi numòna anyi?), mémè mwenzè *cikampàndà*, anyi mémè mwenzè *cikansanga*, nè cìndi mufwànyine kwenza *kaaba aka*, anyi ndiku, anyi ncyènakù to,” yêyè nè, “too nè pangàlu kuumvwa malongesha èbè.” Yêyè nè: “Dìbà adi aci kukòsaci bwalu musangu wùmwè bwà kashidi.” “Bwalu mukuukwidi pàdiye ànu nè wàkèzùdiibù ku mpèkaatù yèndè kàcyèna kàbìdì nè civùlukilu cyà mpèkaatù to.” Úkaadi muumùke ku lufù muyè ku Mwoyi, nè yêyè ùdi nè Mwoyi wà Cyendèlèlèlè munda mwèndè musòmbèlemù nè kèna mwà kufwà to ànu mùdì Nzambi kàyì mwà kufwà amu. Menemene ànu Bible. Nwamònu anyi? Yêyè mmutabalèèla cyendèlèlèlè, bwalu ùdi nè Mwoyi wà Cyendèlèlèlè.

⁵¹ Mpindyewu, aci kacyèna cyùmvwija nè udi mwà kwenza mpèkaatù kakùyì bwalu to, bwalu paùdì wenza mpèkaatù udi unyookiibwa bwà mpèkaatù yèbè. Cyà bushùwà menemene. Kàdi pàdì ànu Mwoyi wà Cyendèlèlèlè munda amu, udi ushààla nè mwoyi kashidi. Yesù wàkamba nè: “Ewu udi umvwa Dìyi Dyanyi (Yone Munsantu 5.24)—ewu udi umvwa mèyi Àanyi, witabuuja Yêyè udi muNtume, ùdi nè Mwoyi wà Kashidi, nè kààdyàkupicilakù ku cilumbulwidi to, ùdi—kàdi wàmanyi kuumuka ku lufù wàyì ku Mwoyi.” Nwamònu anyi? Bònsò . . . “Muntu nànsha umwe kèna mwà kulwa kùNdì pàdì Taatù Wanyi kàyì mumukòke dyàmbedi to; nè bònsò bàdì bàlwa kùNdì abu, Mémè . . . Nè bònsò bàdì Taatù Wanyi muMpèèshe nebàlwe kùNdì.” Ncyà bushùwà. “Bònsò bàdì Yè mufile nebàlwe, nè nànsha umwe wa kùdìbò kààkujìminakù to. Nèmbàpèshè Mwoyi wà Cyendèlèlèlè nè kumubiisha ku lufù ku matùkù à ndekeelu.” Yone Munsantu 6. Kaa, ditwishiihwa kaayi dibènèshiihwe’s wè! Nwamònu anyi? Dìbà adi kabyèna bikèngela bwà wèwè kwenda nè bwòwà bu wa kufwa nè kudikonka to.

⁵² Nzambi mmutùpèèshe ditwishiihwa dipwàngàne dyà nè twètù tudi bânà Bèndè. Nènku bu bânà Bèndè, Yêyè ùdi ùtùlongolola ànu mùndì ndongolola bânà bàanyi, munùdì nulongolola bânà bèènù amu. Pàdìbu mu bubì, tudi tubàlongolola. Pàdì—pàdì bânà bàanyi bènza cintu cibì, dìbà adi mmudimu wanyi mémè bu taatù bwà kubàlongolola. Nènku dìbà adi, pàdì bânà bàà Nzambi bènza bibì, mmudimu Wèndè bu Taatù, nè Yêyè neànùlongòlòlè. Vùlukaayi ànu aci,

nenùlongolodiibwè. Kàdi paùcìdi ànu nè udi mwan'Èndè apu, bikèngela bwà bàà pa buloba kabàkulengi cyanza to (ncyà bushùwà!), bwalu Yèyè wàkamba nè: “Mbitàmbe bwimpè bwèbè bwà bàkuswikile dibwe dyà mpelu mu nshingù nè bàkwinyijè mu màyi mu ndòndò wa mbù pamutù mene pàà kutwàla cilèndwishi pa umwe wa ku bânà bakesè bàdi bàNgiitabuujà aba.” Ncyà bushùwà. Cilumbulwidi aci neciikalè bishi?

⁵³ Mpindyewu, Mwanèètù Pat, ndi ngalùkila ku lukonko lwèbè. Nyumà yàkapàtukà mu muntu awu, yàkamuvwija bu mubùlùke ayi (nwamònu anyi?), yìdi yènza cintu cìmwècìmwè aci leelù ewu mu bantu. Nwamònu anyi? Nnyumà ayi, binunu misangu binunu. Nènku dyabùlù ùdi ùbwelamù ànu bu nè ndambù mukèsè wa mulungu. Mbyenzè ànu bu mùdibo bàngata mwànà wa bakàji mukèsè wa mu kàlaasà; cintu cyà kumpàlà cyènzàbo nkumufikisha ku dinwà dyà mfwankà. Nwamònu anyi? Ùdi ùtwàdijila ànu ku aci's. Nènku cintu cìdi cilonda cìdibo bènza, nèbàcìkolèshe ndambù. Nènku dībà adi, katanci aka anyi, cidi cìkashààla dyamba dyà marijuana; nè pashìishe kuumukila ku aci, cìtungunuka nè mu ciibidilu cyà dikwàcika dikolè dyà dyamba. Cidi cyènza cinyi? Cidi cibàfikisha ku dipaala. Bàdi ànu batombòka, nè dyabùlù mmubàkwàte. Nwamònu anyi?

⁵⁴ Pa nàнку dyabùlù ùdi mu dinwà dyà mici yà mfwankà. Aci's ke mmwènekèlu wendè mutekète. Mpindyewu, yèyè mumòne nè udi nè meeji matwè bikolè nè mufwànyine kubàkula aci, kààkucilekela ciya kule bikolè menemene kutàmba kunwà kwà mfwankà nànsha. Nwamònu anyi? Pàdiye ànu mwà kukukwàta mwaba awu ntàntà mukumbàne, too nè mùdiye mwà kwàngata, kukunyènga mwoya wèbè awu, bwalu yèyè mmumanyè nè kwèna mwà kuya pàdi Nzambi kàyì mwàmbè nè ùye to. Kàdi neùmvwè diyiisha pa diyiisha, mukenji pa mukenji, nè cisùsù paanyimà pàà cisùsù pa bwalu abu, nè didìmwija paanyimà pàà didìmwija pa bwalu abu; kàdi yèyè mwà kukulamina ànu kule naabi nè kulaminyina meeji èbè pa cikwàbò cintu, bu mùdi kwikala muntu mumanyike bikolè, anyi nè bikèngela wìkale naaci, anyi cintu kampàndà cyà mùshindù awu, dībà adi ùdi ànu ùkulama mwaba awu too nè pàdiye ùkujimija. Anyi yèyè mwà kukulekela ànu ukashààla wa mu èkèleeziyà nè wamba nè: “Mémè's nèngìkale ànu muntu mwimpè. Nèshintululè biibidilu byànyi. Nèmpetè. . .Nè—Nènyè ku èkèleeziyà bwà nkashààlè wa mu èkèleeziyà.” Bu yèyè ànu mwà kukulamina mu byà nàнку abi, ke cyònsò cidiye cyà kwenza aci. Yèyè ùcidi ànu mukupyè, bwalu wèwè. . . Yesù wàkamba nè: “Bulelèlà, bulelèlà (mbwena kwamba nè kakùyì mpatà to, kakùyì mpatà to), Ndi nzwàmbila nè, muntu yèyè kàyì mulediibwe kùdi màyi nè kùdi Nyumà to, kààkubwelakù mu Bukalenge to nànsha byà munyi.”

Lekèlaayi nnùleejèku ànu cintu kampàndà. Mwya nyiikilangana nè mwanèètù kampàndà wa balùme mu mapingaja emu, Mwanèètù Wood, patùvwà mu lwendu

kampàndà, bapàtùke ànu cyanààna, nteeta bwà kulekelelakù meeji, kudikanda ku dyakula bwà kupetakù diyì dikùmbàne bwà kwakula dilòlò edi.

⁵⁵ Mpindyewu, mònaaayi's! Tudi tupweka kwînshì eku nè tubàkulakù ditungù dîmpè dinène dyà ditalà. Nditungù dyà ditalà dyà ditàmbe kwikala dipwàngànè didiku mu ditunga emu adi. Nènku nêngiikalè mwà . . . Èè, ditalà anyì mulungu, mwònsò munùdi baswè kucibiikila amu. Ndi mwà—ndi mwà kuya naadi lwà ku Cìsalu cyà Cìnsàngansànga cyà ku Clark County kwàka, ndi mwà kwitaba kaaba kàà kumpalà bwàdi. Dyòdi's nditungù dyà ditalà dyà ditàmbe bwîmpè, ditalà dyà ditàmbe kupwàngana didiku, dyà kacya ngàmòna pàanyi. Nèmpetelèku kakàbà kàà kumpalà. Ndi mwà kuya naadi ku Floyd County; ndi mwà kuya naadi ku Harrison County. Ndi mwà kuya naadi ku province, nè ndi mwà kuya naadi ku ditunga. Kàdi's didi mwà kwitaba kaaba kàà kumpalà myaba yònsò. Bwalu nditungù dyà ditalà dyà ditàmbe kupwàngana. Nè beena maalu à mamanya nè bineté byàbò binène abi, bàdi bàdikenketa, nè bàdi bàdikenketulula, bàmòna ní. . . Didì nè búngì bupwàngàne bwà binshidimba, nè búngì bupwàngàne bwà kàlisiyumù, nè—nè mutaleela mupwàngàne. Cyònsò cidi munda mwà lutete lwà ditalà alu ncipwàngàne ànu menemene. Mpindyewu, wèwè udi wamba nè: “Nêngiikalè mwà kulùkùna bwà mèmè kupetelakù lukwàbò lutete lupwàngàne.” Nènku udi ulùkùna mu buloba. Ànu ditalà adi, lutete lupwàngàne alu, lwòlù nè mùtòlokù wà mwoyi munda mwàlù, cyanààna nelùshaalè mwaba awu nè kubolalù, nènku's ke ndekeelu walù nyèyè awu. Kalwàkutòlokakù kàbìdì to, nànsha lwòlù lupwàngàne bishi. Kadyà—kalwàkutòlokakù to ànu lwòlu lutòlwesha nè mwoyi mupyamùpyà munda mwàlù.

⁵⁶ Nènku udi mwà kwangata muntu. . . Mpindyewu, ncyèna ngàmba eci nè meeji à kutàpangana ku mwoyi to, ndi ànu. . . Ewu ng'èkèleeziyà, ewu n'tabernacle wanyì, nè ndi mudiiikàdile ànu bu kanyuunyì. Nwamònu anyì? Mpindyewu ndi muswè bwà nùvùlukè, nè mu cyòci eci, muntu ùdi mwà kwikala mwîmpè; ùdi mwà kufuta byàdiikùmì byèndè; ùdi mwà kwikala nè meeji matòòke; ùdi mwà kwambulwisha mukàji mukàmbà; ùdi mwà kwambulwisha mwànà wa nshiyà; ùdi mwà kwikala cidimba cyà èkèleeziyà. Kwèna mwà kupeta cilèma nànsha cimwè kùdì muntu awu to. Musangu wònsò wùdi bwalu kampàndà nè cyà kujuuca, ùdi wèla ànu cyaanza mu mpaayà, wàngata dyyèyè dyà ndekeelu dìvwàye naadi bwà kupèèsha bapèlè. Yèyè neikalè—yèyè neikalè mwà kwimana ku luseke lwèbè mu mabika nè mala. Yèyè's neikalè mulundà webè piikalà mene nè bakwàbò bààbúngì bàà ku dìnà abu bakulekèle nè bikwàbò byònsò byà mùshindù awu abi; kàdi muntu awu ùcidi ànu pambèlù pàà Bukalenge bwà Nzambì piikalàye kàyì mùjiibwe tètè nè Nyumà Mwîmpè to, Mwoyi wà Cyendèlèlè. Ncyà bushùwà! Ke mùdiye nè mushinga nànkù.

57 Ke bwà cinyi ndi nteeta kufikisha èkèleeziyà wanyi ku dimona cyòci eci. Nènkù ndi—ndi ndòmba bwà nè kanwèdikù meeji nè ndi nteeta ànu bwà kwenza maalu nè budimù pa bwalu abu to. Ndi—ndi nteeta kunwambila nè dyabulù ùdi ùseeswishangana bikolè be, nè yèyè ùdi ùseeswishangana bikolè mu mùshindù wà nè yèyè—yèyè neàkwenzèjè maalu bu mwena Kilistò. Yèyè neenzè cintu kampàndà nè kutentula Kilistò too nè ku Basungula mene. Bible mmwàmbè nè nebiikalè bafwànàngàne menemene. Newikalè muntu mwimpè. Newikalè nè...

58 Mpindyewu tàngilàayi kùnweku, lekèlaayi nnùleejè bileejilu bwà kwikala batwishibwe mpindyewu. Tudi baswè kucilama mu Mifundu patùdi pa nyumà eyi apa. Esawù ùvwa muntu mutàmbe bwimpè mu mùshindù wònsò wùvwà muswè kucyàngata awu kutàmba mùvwà Yakòbò amu. Mpindyewu, Esawù (Nzambi àmfwilèku luse bwà díyì edi), yèyè ùvwa ànu mwena budimù ndambù. Kwàjiki. Mpindyewu, bu nwènu mwà kumumòna, yèyè ùvwa cinyi? Keena bijaanu nè keena mashimi kanène. Mpindyewu, mèmè—mèmè ngàmbe bibi, Nzambi àmfwilèku luse, kàdi yèyè's wàkashima bulelèlè. Nè mwena diibila, kakùvwakù nànsha umwe wa bu yèyè to. Pààkangatàye tuumicì twà makejimizeji atu mene nè kutùtèeka mu màyi bwà kufikisha ngombe yìvwà miimite mafù nè mikòòkò kuntwaku ayi bwà kulelayi mikòòkò yà makejimizeji nè ngombe yà makejimizeji, bwà kuyàngatayè kuyishiya yèndè—yèndè sungasunga... Cyàkenzàye ncinyi? Wàkavwàla nkooci wa Esawù nè cipese cyà cisèbà cyà mùkòòkò nè bikwàbò byònsò, nè kubànda kuntwaku, nè kwidikija Esawù kumpalà kwà tatwèndè mpofo wa bwalu awu mwikàle mupròfeta. Ncyà bushùwà anyi? Mòna's, kwòkù's kàvwa keena maalu makònyàngàle; ke cìvwàko bushùwà. Nè Esawù ùvwa... Kabivwa bikèngela bwà mèmè—pàmwàpa kabivwa bikèngela bwà mèmè kwikala mucyàmbè mùshindù awu to. Nwamònu anyi? Ncyèna ncyàmba mu mùshindù awu to. Nè—nèngùumushè aci. Yèyè—yèyè ùv—...yèyè—yèyè ùvwa... Ncyèna mumanyè to; nudi bamanyè cìvwàye's. Nwamònu anyi? Elàayi ànu meeji cyanàànà mu mutù wènu amu; Nèngùikalè... Yèyè ùvwa—yèyè ùvwa muntu munène wa Nzambi, nè ncyèna muswè kwamba cintu nànsha cimwè cibi bwèndè yèyè to (nudi numòna anyi?), kàdi ndi ànu muditwe mu kuteeta bwà kuleeja bintu bikesè—bikesè byàkenzàye. Mònaayi ànu mùshindù wùvwàye nè budimù's. Mwena mashimi? Bushùwà's, yèyè's ùvwa ànu—yèyè's ùvwa wenza bwòwà. Kàdi cìvwàye ùteeta kwenza ncinyi?

59 Tàngilàayi Esawù. Esawù's ùvwa muntu mwimpè, wa nsòmbelu mulenga, cidimba cimpè cyà èkèleeziyà leelù ewu. Cyàkenzàye ncinyi? Yèyè ùvwa cilembi. Wàkapàtuka... Mu bushùwà bwà bwalu díbà adi, mùshindù awu ke wàkadìbo basòmbè. Ùvwa nè cyà kutàbaleela bisumbù byà bimunà bwà

tatwëndè. Tatwëndè ùvwa mpofo. Mupròfeta, mupròfeta wa Mukalenge ùvwa mpofo nè museeswishìbwe kùdi mwanèndè sungasunga, mupròfeta, Izàkà; ku yéyè nkwàkalwilà Kilistò. Nudi mwà kumubiikila nè mmupròfeta, Bible mmwàmbè nè ke civwàye. Kàdi ùvwa mpofo anyi? Kàakadyòndopa yéyè mwinè bwà cinyi? Kàdi mbwà cinyi yéyè kí mmumanyè nè awu ùvwa Esawù—nè awu ùvwa n'Yakòbò pamutu pàà Esawù? Nwamònu anyi? Nzambi kàtu wàmbila bapròfeta Bèndè bintu byònsò to. Udi ànu ùbàmbila cidìYe muswè bwà bòbò kumanya. Nwamònu anyi?

⁶⁰ Nzambi ùvwa wènza ndongamu kampàndà díbà adi, nè byàkakèngela bwà yéyè kukwàtamù mudimu. Nzambi . . . Bu wèwè mwà kukòokela Nzambi, Nzambi nèakufikishe ku dikwàta mudimu ànu mu ndongamu Wendè.

⁶¹ Mpindyewu, mònaayi cyàkenzàye, cyàkenzà muntu ewu's. Esawù wàkapàtuka nè wàkateeta bwà kutàbaleela tatwëndè mukwàte nè byà luse, mukùlàkàji, mpofo awu; kàdi Yakòbò, pa kutàngila, kàakacyùka cyàkamwenzekelà to. Kàdi kùdi cintu ànu cimwèpelè civwà Yakòbò ùkèba, civwa mbukenji bwà bwanààbutè. Kàyì ùtàngila cyàkalwà, mùshindù wàkamupètaye, mu cipidi civwà cikèngela bwà yéyè kulwa, bukenji bwà bwanààbutè abu ke cyònsò civwàye ùcyùka. Nènku Esawù, Bible mmwàmbè nè, wàkadyombola bukenji bwèndè bwà bwanààbutè; Bible ngudi mwàmbè nànkù. Nènku Bible mmwàmbè nè: “Bwà kakwikadi mwà kulwa mwena masandi kampàndà wa pàtupù munkaci mwènù, byenze bu muntu mubi awu Esawù wàkadyombola bukenji bwèndè bwà bwanààbutè nè kubùsùmbisha ku dilòngù dyà musàbù . . .”

⁶² Mpindyewu, bukenji bwà bwanààbutè ncinyi? Mbukenji. Ke cìndi nteeta kunwàmbila mpindyewu ncyòci aci. Nyumà Mwìmpè ewu ke bwèbè Bukenji bwà bwanààbutè; ke bwèbè Bukenji bwà bwanààbutè. Ke bukenji bwèbè bufila kùdi Nzambi. Mpindyewu, bantu bàdi bamba leelù ewu nè: “Mémè nényè mu èkèleeziyà. Mémè ndi mwìmpè ànu mùdi muntu udi ulonda awu amu. Kàdi bwànyì mémè, bwà kenza maalu bu umwe wa ku bansantu babùnguluki bàà mu malaba abu anyi? Kì mmémè to.” Èè, wèwè Esawù's wè! Nwamònu anyi? Cidi ànu cintu cimwècimwè aci, bàdyombola bukenji bwà bwanààbutè. Mòna's, yéyè wàkabùshintakaja nè dilòngù dyà musàbù. Kàdi wèwè udi ubùsùmbisha ku di- . . . Ncyèna nkwamba wèwè to, kàdi bàà pa buloba bàdi bàbùsùmbisha bwà cintu cishààdile ku aci.

⁶³ Esawù ùvwa nè nzala. Kàdi, nudi numòna's, bu bwìmpè nè cyà kubadiilwa . . . Bu muntu kampàndà . . . Bu twètù babànde kuntwaku nè bashààle basòmbe banyùngùlùkile nteentà awu bwà ndambù wa—wa matùkù, tudi bafwànyine kujandula nè Esawù ùvwa . . . Nùnkù's tuvwa kusungula Esawù. Nwamònu anyi? Kàdi mu mwoyi wèndè yéyè ùvwa ùkèba bukenji bwà

bwanààbutè abu. Kàvwa ùcyùka cintu cikwàbò nànsha címwè to; yéyè ùvwa ùkèba bukenji bwà bwanààbutè abu. Ke cyònsò cìvwàye muswè ncyôci aci.

⁶⁴ Nènku Esawù ùvwa muswè kwikala muntu mulenga, kàdi ùcyùka bintu byònsò, nè wènza bintu byònsò ànu mu byôbi, nè kuvwija bintu byònsò ànu bu . . . Yéyè ùvwa mwena nè ànu mikenji wa menemene; ke mùvwà Esawù. Ùvwa ùkèba bintu byònsò ànu mu byôbi. Nè Yakòbò ùvwa ùkèba cintu ànu címwèpelè, nè cìvwa mbukenji bwà bwanààbutè, nè ki cyònsò cìvwàye ùcyùka ncyôci aci. Nènku Esawù . . . Nudi numòna cyàkenzekelà bânà bàà balùme bònsò bàbìdi abu's. Nwamònu anyi? Nè mu Yakòbò mene ki mwàkapàtukà bankambwà dikùmi nè bàbìdi bàakapàtulà, èè, bisàmbà dikùmi nè bìbìdi byà Izalèèlà, mu Yakòbò. Nè wàkabiikila—nè Nzambi kubiikila Yakòbò nè mwan'Èndè sungasunga. Nudi bamòne cìndi njinga kwamba aci anyi?

⁶⁵ Nyumà Mwímpè awu ùvwa ne cyà kwikala nè mushinga kùdi kutàmba bikwàbò byònsò bìdi pa buloba ebi, buneemè bwèbè, mwoyi wèbè, mudimu wèbè, cyèbè cintu kanà cyònsò cidìku eci. Kàbìvwa bikèngela bwà wèwè kuvunga mabòku paùdi kùyi mwanji kuMupeta to. Udi nè cyà kuMupeta. Ùdi nè cyà kwikala mutàmbe . . . Kàdi wèwè udi wamba nè: “Èè, ndi ncìina nè bàdi—bàdi ku mudimu wànyì. Ndi ncìina nè nkwepi kwàlwà bàyanì, wanyì . . .” Kùmvu bwòwà to; lekèla Aci cyàngatè kaaba kàà kumpàlà. Lekèlà bikwàbò byonsò abi biye. Lekèlà Aci cyàngatè kaaba kàà kumpàlà. “Èè, ndi ntèkemena bwà kuMupeta òmwè dyà ku matùkù àdi panshì aa, Mwanèètù Branham.” Kí ndimwè dyà ku matùkù àdi panshì aa to, mpindyewu! Dìbà ndyòdi edi. “Lekèlà Ikalè wa kumpàlà dyàmbedi nè mèmè—dyàmbedi nè mèmè kwenza ní ncinyi cikwàbò cyònsò. Lekèlà mMupetè mpindyewu!” Mushiiikile! Aci's ncifwànyìne kwambulwisha mu dyandamuna dyà lukonko lwètù. Udi àn- . . . paùdi ushiikila bwà bwalu Bwèndè, bikukèngela bulelèlà bwà kuMupeta anyi kufwa (nwamònu anyi?) dìbà adi ke paùdi uMupeta apu.

⁶⁶ Mwena Yudà kampàndà mukesè uvwa kale wàwa mu címenga emu. Ncyèna mumanyè ní nuvwa bamumanyè anyi to. Ùvwa mwondòpiibwe ku kànsèrè. Bòbò kumupa—kumwipata. Nènku pàakabàtìijibwàye mu Dìna dyà Yesù Kilistò, dìbà adi ki kumwipatabò bulelèla, kumwelabò pambèlu mu bulà amu. Ke pashiishe kuyayè kashàala wa mu èkèleeziyà wa ba-Méthodistes. Ke kusanganabò nè yéyè ùvwa mubàtìijibwe mu Dìna dyà Yesù, nè kumwelabò pambèlu mu mashika makolè kuulu kwikale kwa degré cijèngù, degré dikùmi mwìnshì mwà cijèngu, mu Ohio; kumwelela bulàalu pambèlu apu (Mwanèètù Fleeman, udi nè cyà kuvùluka Mwanèètù Vance, kí mmwòmò anyi?)—kumwelabò pambèlu, pambèlu apu, nè mulonda wà màyi pambèlu apu, kwambabò nè: “Kùdi màyi bùngì bukùmbàne bwà wèwè kubatìijibwa cyàkàbìdi mu Dìna dyà Yesù, ngèèla meeji.”

67 Kàdi, yéyè's ùvwa ùndondela kaabwalu-kalonda kakesè musangu kampàndà. Wàkamba nè pàvwà bantu *kampàndà* aba, mukàjèndè—bòbò bàvwa bàshààla nè... Nènku yéyè wàkakùngwija bintu byèndè byònsò byà kale mu dishinyi dyà kale dyà cisemuna dicyòke nè kubanga kupàtuka mu cimenga. Ke mukàjèndè kwambayè nè: “Uvwa mumanyè mùdi bwalu anyi? Bivwa bikèngela mèmè kunwàku màyi kumpàlà kwà mèmè kuumuka mu mwaba awu.” Yéyè nè: “Ndi nè nyòòtà.”

Èè, yéyè nè: “Munanga wanyì, kàdi's mmpompì wàwa.”

Yéyè nè: “Èè, tùngunuka too nè pawàfikà pa mwaba mutàmbe bwìmpè.” Nudi numòna anyi?

Ke yéyè kuya kule ndambù, nè kwambayè nè: “Mukwàbò mpompì nyéyè wàwa's.”

Yéyè nè: “Èè, tùngunukà ànu cyanàànà.” Nudi numòna anyi?

68 Kàdi yéyè nè: “Dìbà adi, pàakaditwàye pambèlu mu njila wa cisuku, kamùvwa mpompì nànsha wumwe to.” Yéyè nè: “Ùkaavwa ànu wàmba kulwangana bwà—bwà kupetakù màyi à kunwà.” Ke yéyè nè: “Paanyimà pàà katanci, lwà mu mpàta amu mùvwa mpompì wa kale wa màyi, mu mpàta amu, dyàmwàmwà dyà musùmbà wà ngombe; pèndè ùvwa nè bwòwà bwà ngombe.” Kàdi kwambayè nè: “Mukàjànyì kwambayè nè: ‘Levi, ndi nè cyà kupeta màyi à kunwà ànu mpindyewu!’” Ke bòbò—yéyè kwimanyika màshinyi. Nè kwamba, kumpàlà kwà yéyè mene kwimanyika màshinyi bìmpè, mukàjì ùkaavwa pambèlu lubilu nè munkaci mwà kukòsolwela mu lupangu amu. Bivwa bikèngela bwà kupetayè màyi. Nè pàdi Nzambì ùlwa wa cyà bushùwà kùdi, paùdi nè nyòòtà yà mùshindù awu, bwà nè anyi n'Nzambì anyi udi ufwà, kwèna mwà kucitwàla kàbidi ntàntà mule to, dìbà adi cintu kampàndà necyènzekè. Bikèngela—dìbà adi udi ubwela nè Nzambì mu mudimu bushuwa. Aci's mpaùdi wangata—mpàdici cyènzeka.

69 Mpindyewu, nyumà mibi eyi yidi yìseeswisha bantu. Nè yimwè yà ku yòyi nyumà ayi, misangu yàbùngi mmitèndeledi yà menemene. Mpindyewu wèwè udi wamba nè: “Udi muswè kwamba nè, mmitèndeledi anyi?” Èyowà's, mukalenge! Yilongesha mene nè Mifundu, Bible. Yidi yènza nàнку bushùwà.

70 Mpindyewu mònaayi's! Yesù wàkalwa kùdi musùmbà wà bantu bàvwà baakwidi bàà cijila; nè bàvwa bàlama mikenji ku dileetà nè ku dileetà; nènku bàvwa batèndeledi bàà dikèma, bàà dikèma. Ke Yesù—Yone kubàbìkilayè, wàmba nè: “Nwènù lukongo lwà nyòka yà ntòkà (aci's nnyòka), nganyi wanùdimwiji bwà kunyeema cijì cicolè cilwalwà?” Pàakabàmònà Yesù, Wàkamba nè: “Nwènù nudi bàà tatwènù dyabùlù.” Aci's civwa n'Nzambì wàmba nàнку. Ànu batèndeledi nè mwàbò mwònsò.

71 Vùlukàayi nè, pàdi—dyabùlù ùdi wàngata muntu wèndè, kàdi kàtu wàngatakù nyumà wèndè to. Nzambì ùtu wàngata muntu Wèndè kàdi kàtu wàngata Nyumà Wèndè nànsha.

Nwamònu anyi? Nyumà Mwímpè ùdi ùbwela mu mwoyi wèbè nè ùjidila nyumà webè, ùdi ùsòmbela munda mwèbè, nè ùkupèèsha bukolè bwà wèwè kwikala nè mwoyi. Kàdi pàdi—pàdi nyumà webè ùùmuka, nyumà webè mmulamiiibwe kùdi Nzambì; kàdi Nyumà Mwímpè uvwa pambidi pèèbè awu ùdi ùlwa pa muntu mukwàbò, nè muntu mukwàbò, nè muntu mukwàbò . . .

⁷² Nyumà uvwa pambidi pàa Eliyà ewu wàkalwa pa Elishà, mpìtu yìbìdì Yèndè; bidimu nkàmà mwandamutekète pashiishe anyi nkàmà mwandamukùlù paanyimà wàkalwa pa Yone Mubàtìiji, byàkamufikisha ku dyenza maalu. . . Tàngilàayi numòne mùvwà Eliyà, tàngilàayi numòne mùvwà Eliyà's: muntu munènè wa kale wa bôya pambidi, nè myedi kwìsù kwèndè kwònsò aku; cisèbà cyà mùkòòkò pambidi, ùmwènèka bu cìshì cyà myòsà pambidi, kwìsù kwèndè mùshindù awu, wènda ùtwa ngendu nè mikùmà kuntwaku nè cipese cinène cyà ciseba cidijingila, nè mikàbà bu—mikàbà mijingila mu cìfùka, mùshindù ewu. Bu wìkalakù. . . Bu wìkalakù mulwè ku nzùbu kwèbè aku nùnkù's udi mwambè nè: “Kaa, ekèlekèle! Bìkilàayi baampùlushi pa lùkàsà. Muntu bu nùnkù mmwimàne kumpalà kwà ciibi cyànyì.” Kàdi awu's uvwa mmupròfeta wa Mukalenge. S'ki cìvwàye bushùwà! Nè pashiishe, pàakafwàye, mpìtù yìbìdì yà Nyumà wèndè kulwayì pa Eliyà; nè pashiishe bidimu nkàmà mwandamukùlù paanyimà kulwayè pa Yone Mubàtìiji nè kwenzayè maalu ànu menemene mwàkenzàbo amu, bwalu uvwa n'nyumà wa Eliyà.

⁷³ Mpindyewu, piikalà nyumà wa Eliyà pambidi pàa Yone mwà kwenzeja Yone maalu bu Eliyà, Nyumà wa Nzambì pambidi pèèbè neàkwenzèjè maalu bu Yesù. Mpindyewu, mwaba awu ke wùdi usangana Nyumà Mwímpè. Nwamònu anyi? Ke cìdì Nyumà Mwímpè wènta ncyòci aci. Udi ùkuvwija mupòle, ùkuvwija mudìpwekèshe, ùkufikisha ku difwilangana dyà luse.

⁷⁴ Mbatwànyine kukunana myedi ku cibàngà, bu nè uvwa naayi kuntwaku, kuyijoomona nè kukutwila matè mwìsù, paùvwà nè bukolè bwà kubìikila bi—bisùmbù byà Banjèlò apu anyi? Udikù mwà kwenza aci bwà dinanga dyà bantu bàvwà bàkutwila matè mwìsù anyi? Udikù mwà kucyènza anyi? Bu muntu mwà kwikala mulwè ànu tàmakàtàmakà too nè kùdi wàmba nè: “É, mwena lubombo naanyi wè!” nè kukubàngula dipì ku ditàma, udikù mwà kusambila bwà difwidiibwa dyènde dyà luse anyi? Mpindyewu, mwaba awu ke ùdi dyeyemena—wùdi uteeta ní udi nè Nyumà Mwímpè anyi to. Nwamònu anyi? Pàdi muntu wàmba cintu kampàndà cìbì bwà muntu kampàndà, misangu mikwàbò udi wamba mùdiye nè Nyumà Mwímpè awu: “Nénjikijanganè nè mukàji awu pangàmà kufwa.” Nwamònu anyi? Mpindyewu, ke mwaba wùdi wukenkecila Nyumà Mwímpè webè ngwòwò awu. Nwamònu anyi? “Nudi babènèshiiibwe pàdi muntu mwà kwakula bibì byà mishindù yònsò bwènu nwènu bwà bwalu bwà Dìna Dyànyì.” Kàdi wèwè uyàaya kajikijangana nèndè anyi?

To! “Sànkaayi nè ikàlaayi nè disànkà dyà diyila nè panshì, bwalu ke mwàkakèngeshàbo baprófetà bàvwà kumpàlà kwènu.” Nwamònu anyi?

⁷⁵ Pàdiku muntu kampàndà wàkula bibi bwèbè wèwè, ambà wèwè cintu kampàndà cyà cimpè. Wèwè kuyi mwà kwamba cintu kampàndà cyà cimpè bwèndè yèyè to, dîbà adi kwàmbi cintu nànsha cimwè to. Cìlekèlè ànu nànkù. Nwamònu anyi? Nè pashìishe, paùdi pàà nkàyeebè, musambidile.

⁷⁶ Kwòkò cintu cimwèpelè mu nsòmbelu wanyi citù cìnkwàcishe bwà mèmè kuumvwa nè Nyumà Mwimpè wàkabwela munda mwànyì kwìnshì kwàka ditùkù adi, cìvwa ncyòci aci. Mèmè mvwa muntu wa ciji cìkolè, cyà cìlàkuka kapyà, Irlandais ku taatù nè ku maamù. Nènku mvwa misangu yònsò ànu bwà kudyà nè lutàtù lukolè, mukana mwànyì mùvwa misangu yònsò ànu mpùtá yà pàvwà muntu kampàndà muntuutè, mbìnduluka mwaba wùvwà kawùyì wùkèngela bwà mèmè kubìnduluka to. Patùdi twakula apa’s ndi nè àmwè à ku mènù makòsèke nè beelàmu bintu pàmvwà—pàmvwà mwakulè mwaba wùvwà kawùyì wùkèngela bwà mèmè kwakula to (nudi numòna anyi?) nè mwambè bintu... Misangu yònsò ànu mu bilumbù. Ke mèmè kwamba... Muntu kampàndà kungambilayè, mulongeshi wanyi mu kàlaasà, kwambayè nè... Mèmè nè: “Inábànzà, ncyèna—ncyèna—ncyèna nè cìndi mwà kwenza to.” Nwamònu’s, s’mvwa mu bilumbù dîbà dyònsò. Ke mèmè kwamba nè: “Ncyèna nè cìndi mwà kwenza to.” Maamù Temple mununu mukwàte nè byà luse awu, ngùcìfùma ku diya mu Butùmbi ditùkù adi.

Ke yèyè nè: “Èè, tàngilà Munanga wanyi.” Kungambulayè pa bibelu, nè kunkòkelayè mu mabòkò èndè è kwasayè mwadi. Ke musangu wà kumpàlà wà mèmè kupeta dinanga bu nànkù dyà kùdi muntu kampàndà, maamù mukolè. Kwasayè mwadi ùdila bisònji bìmacila pamutù. Yèyè nè: “Billy, nènkwenzèlèku cintu kampàndà, Munanga wanyi; nènkupèèshèku kaamwonjì kakesè.” Ke yèyè nè: “Umwe wa ku bàna bàà balùme abu yèyè muddyele pambidi pèbè...”

⁷⁷ Bàvwa bangiinyike nè “mutùdishi wa matalà,” bwalu mvwa wa ku Kentucky, nudi bamanyè’s, nè—nè... Mvwa—mvwa bulelèlà mvwàla bilàmbà bibi be. Nènku’s bàvwa mwà kunsèka bwà nsuki yànyì, mìlembèlèle menemene ànu bule bùdiyì mpindyewu ebu, nè yònsò mimpwekèle mwìsù. Nènku mvwa ànu munkaci mwà kupicila mu cikondo cyà bwalu bukolè, nudi bamanyè’s. Nènku—nènku bàvwa mwà kuntuuta eku nè eku nè kuntàpa mapi. Dîbà kanà dyònsò divwà ní nganyi ùbìnduluka adi, ùvwa mwà kwasa lwendu, nè kulwa kumpyà, kàdi kuntàpa mapi’s. Nènku ke mèmè ulwàlwa ewu. Nwamònu anyi? Nènku ke—ke pashìishe—ke mvità àyi. Nènku tuvwa—tuvwa mene nè, mvwa ndwàngana mene nè mvità yà twelà nè bikwàbò byònsò.

⁷⁸ Ngàkangata cingoma cyà Winchester nè kuteeta kucituuta, kucipwidijila mu bānā bāā balūme bānaayi anyi bātaanu, bāvwa bāfūma ku dintuuta mu mūshindū wā binkolēle nè mwā kwimana kuulu. Mvwa mwā kwikala mushipe yōnsò wa kùdibō bu kabūyi bwā Nzambi. Mēmē kwangula mintēlēnge yā ntende panshī apu, kuyipāya mu cingoma aci; yōyi kadi kusāba ànu bīmpē bu mwāyi nè kale. Nwamōnu anyi? Mvwa mufwānyine kwikala mushebeyi wa bantu bātaanu, pāmwāpa, anyi nsongāālūmē yitaanu.

⁷⁹ Mvwa ànu nè bidimu bitwē ku dikūmi nè bibidī, nè ciiji cyā cibi! Ke mulongeshi kwambayē nè: “Angatā wēwē kaamwonji kakesē, Billy, nè dībā kanā dyōnsò dyūdi upeta ciiji, imānē wēwē cyanānā nè ūswikē majitā citēēmā ku kaamwonji aka.” Yēyē nè: “Paūdi wenza nānku, dībā adi udi ulwa nè kaamwonji aku kūndi. Ndi ncinka nè ciiji cyēbē necijikē.”

⁸⁰ Mēmē nè: “Mandamu Whalen, ncyā bushūwā nè ndi ngēēla meeji nè wēwē udi mulenga wa dikēma.” Mēmē nè: “Nē—nēnciteetē.” Nwamōnu anyi? (Anyi Mandamu Temple; ndi ngamba mēmē nè Mandamu Whalen. Mēmē kwamba nè Mandamu . . . Mukalenge Whalen ūvwa mulongeshi kaaba aka musangu kampāndā.) Ke mēmē—mēmē kwela kaamwonji mu mpaaya. Nēnku nciyi nānsha mwanji kwenza tusunsa tūtaanu mu bulā amu ke muntu kampāndā kunnāngula dipi. Èè, mēmē kuya—kutwādija nè ngēnzā majita, nudi bamanyē’s. Mēmē kwela cyanza nè kubākula kaamwonji kàanyi aku; nè mēmē kutwādija kukūta dijitā dimwē; Mēmē kwimansha kaamwonji panshī, ke mēmē uyāāya wāwa. Nwamōnu anyi? Nciwva ànu mwā kucyēnza to. Nwamōnu anyi?

⁸¹ Ke mēmē nè: “Nciwvakū mufwānyine kwikala mwena Kilistō to.” Kadi lekēlaayi nnwāmbilēku nè, dilōlō adi lwā kwīnshī mu Mūsēsūs wā Ohio mwāmwa pāakabwelā Nyumā Mwīmpē munda mwānyī, aci cyākakōsa bwalu bwā ciiji aci. Aci’s ciwva cijikē. Mvwa mwambē nè: “Nciwvakū mufwānyine kucyēnza to. Nciwvakū mufwānyine kwikala mwena Kilistō to, bwalu nciwvakū mufwānyine kucipita makāndā to,” mēmē nè: “ncintu cidi cilediibwe munda mwānyī.” Mēmē nè: “Mulūmyānā, papa wanyī ūvwa muntu wa ciiji cikolē cyā kacya; nè—nē māmū wanyī, ūvwa citūpā wa ba-Indiens, nè ciiji cikūmbāne bwā kulwangana nè scie wa ūnyūnguluka.” Mēmē nè: “Mēmē? Kaa, ndi . . . Balūmyānā, muntu yōnsò wāmbūndula awu neācipete; kwajiki.” Mēmē nè: “Nānsha byōbī bikēngela bwā mēmē kubānda ku cibāndilu bwā kumutuuta,” mēmē nè, “ncyā bushūwā nè nēncyēnzē.” Nwamōnu anyi?

⁸² Kadi mpindyewu, udi mwā kumpulumuna kuntwaku nè kumbūnguluja mu bitoci kadi . . . Nwamōnu anyi? Bwā cinyi? Kī mmēmē to! Cīndi nteeta bwā kuleeja kaaba aka ncinyi? Cintu kampāndā ncyēnzēke. Bukolē bwā kale abu, William Branham wa kale awu wākafwā, nè Muntu mukwābō kubwēlayē. [Katupā

kàà mukàbà wà mèyì munda mutupù—Muf.] Nè Cìdi cyènza bwà ngùmvwilè mwena lukunà wanyì luse. Pàdi ní nganyì ní nganyì ùngenzela bwalu bubì, ncyèna mmusambidila bwà dinyooka to, ndi nsambila bwà dyàkalenga dyèndè. Nènku's ke mwaba wùvwà Nyumà Mwìmpè mufile diteeta adi dilòlò adi mu Nouvelle Angleterre, kumpalà kwà cyôci eci kwenzekaci kaaba aka. Pàvwà—pààkafilàYe bukòlè, kwamba nè: “Akùlà ànu cyùdi muswè bwà cyènzekelè bantu abu.” Mùshindù ùvwàbo benzè. . . Kè mèmè kutàngila paanshi apu, nè kwamba nè: “Ndi nnùfwila luse.” Ke cìvwàYe muswè menemene ncyôci aci. Nwamònu anyì? Fwila beena lukunà bèèbè luse. Nwamònu anyì? Eyi's ke nnyumà yidi yinùvwija babi ayi. Tàbaleelàayi nyumà ayi.

⁸³ Ke muntu kampàndà ulwàlwa ewu. Ùvwa mu lukità amu. Muntu yèyè mwà kupicila kuntwaku, ùvwa mwà kupàtuka lubilu nè kumucimuna, mùdi Bible mwàmbè. Muntu nànsha umwe—yèyè ùvwa wa njiwù yà menemene mu mùshindù wà nè muntu nànsha umwe kàvwakù mwà kupicila mu njila awu to. Kàdi dīngà ditùkù kùvwa Bukolè butàmbe bunène bwàkapità. Ùvwa mukwàciibwe kùdi lukinu, budimù, dyabùlù, musumbà wàyì mujimà yinyūnguluka, muntu munène awu. Bàvwa mwà kuya kuntwaku, nè kwangata cilwilu, kumwela ku mīnyòlòlò; nè ùvwa mwà kukòsa kusùulula mīnyòlòlò ayi. Nè dyabùlù ùvwa munda mwèndè. Ke yèyè awu. Ùvwa cintu kampàndà. Ùvwa mufwànyine kwikala—ùvwa mufwànyine kwikala lupingù lwà menemene bwà Cilongelu Citumbùke cyà ku Jeffersonville kwàka. Ncyà bushùwà nànkù! Ke yèyè awu's, bònso banène aba. . . Anyì bàmwè bàà ku bansongà aba, nudi bamanyè's: “Kaa, yèyè's mmuntu wa bushùwà.” Nkaadi mumònemòne muntu mwikàle nè bujitu bwà kilos makùmi citèemà kàdi kàyì kantu kàà bulùme mu yèyè to. Awu kī mmuntu to, awu's nyama. Nwamònu anyì?

⁸⁴ Kàdi kùvwa kaamuntu kakesè menemene, kaa tukaaya tukòbàme kapweka nè njila dīngà ditùkù, kenze bu kakòbàmīne panshi (Bible mmwàmbè nè kakùvwa bwìmpè bwà mpàla butùvwà bafwànyine kuMujingila to, nè bidimu makùmi àsàtù kàdi ùmwèka bu wa bidimu makùmi àtaanu), wènda ùpweka nè njila dīngà ditùkù. Ke kupàtukayè lùbilu bwà katwilanganana Nèndè. Yèyè nè: “Nèmbàkule ànu kakwàcikwètù kakesè kàka kàdi kukàkupulula.” Kàdi, kaa, ekelekele, pààkatwilanganàye nè Yèyè awu, wàkapòna ku makàsà Èndè. Démons ayi yivwa mimukwàte bikolè. . . Mpindyewu tàngilàayi. Ditùkù adi. . . Ùvwa mukwàta bikolè kùdi dyabùlù. . .

⁸⁵ Mpindyewu eci, ndi muswè kubweja eci mu—bwènù nwènù. Yèyè ùvwa—muntu awu ùvwa mudilekèlèle mu kaabujimà kùdi dyabùlù, mu mùshindù wà nè dyabùlù ùvwa ùkwàta mudimu nè ludimì lwèndè bwà kwakula. Mpindyewu, udi mwà kudilekelela mu kaabujimà kùdi Nzambi mu mùshindù wà Nzambi mufwànyine kukwàta mudimu nè ludimì lwèbè bwà

kwakula. Ncyà bushùwà! Aci's ke bwànyì bujadiki. Diiyiisha kanà dyònsò dínkaadiku muyiishè òvwàku nè mushinga mu dyòdi, mpàntù ndilekelela, muumushe William Branham mu njila, nè Kilistò mufwànyine kuditwamù nè kubanga kwakula. Nwamònu anyi? Nè Yèyè's ùdi mwà kwakula mu mwakulu.

⁸⁶ Mpindyewu mònaayi's. Ùvwa mukwàta bikolè kùdi nyumà mubì awu, nè nyumà awu ùvwa nendè pabwìpì menemene mu mùshindù wà nè... Démons ayi yìvwa mimanyè nè cikondo cyàyì cikaavwa cilwè, bwalu yìvwa mitwilàngàne nè dinanga. Nwamònu anyi? Ke kwambayi nè: "Netùmuteetè." Nè yònsò... Mpindyewu, mònaayi cyàkenzekà. Yèyè nè: "Mòna's, tudi bamanyè nè wèwè udi nganyi. Bwà cinyi wèwè mu kaamubidi kakesè menemene bu kàà mùshindù ewu, kaamuntu kakesè kàà mmwènekèlu wa kalèndàlèndà?" Yèyè nè: "Udi ulwa mùshindù awu bwà cinyi?" Yèyè nè: "Tudi bamanyè nè wèwè udi nganyi. Wèwè's udi wa cijila wa Izalèèlà, kàdi bwà cinyi udi...?" (Mpindyewu tàngilàayi's! Pawikalà kùyi witabuuja nè kùdi dikèngeshiibwa dicilwalwà bwà baadémons to, tèlejè mùdi eyi yìcìjikula patòoke.) "Bwà cinyi udi ulwa bwà kutùkèngesha kumpàlà kwà díbà kulwadi?" Mmimanyè nè kùdi dikèngeshiibwa dicilwalwà. "Bwà cinyi udi ulwa bwà kutùkèngesha kumpàlà kwà díbà kulwadi?" Nwamònu anyi?

Ke Yesù kwambaYè nè: "Dìna dyèbè nganyi?" Yèyè ùvwa mumanyè; Ùvwa muswè bwà yòyi kucìjikula patòoke.

Awu nè: "Twètù tudi Musumbà, bwalu tudi bààbúngì." Yèyè nè: "Wèwè utwìpata mu muntu ewu..."

⁸⁷ Tàngilàayi, kalùmyànà kakesè kàà kalèndàlèndà bu Yesù kiimàne mwaba awu (nwamònu anyi?), nè muntu ùvwa nànsha mwà kucibwila cilwilu cijimà panshi; minyòòlolò mene kayiyi mwà kumukwàta. Nwamònu's, kí ndikàndà dyà mubidi edi to. Aci kí ncidi nè mushinga to. Mbukolè bwà Nyumà Mwìmpè bùdi mu nsòmbelu webè bùdi nè mushinga. Nwamònu anyi?

⁸⁸ Yèyè nè: "Kutùkèngeshikù kumpàlà kwà díbà kulwadi to; kàdi bu wèwè muswè kutwìpata... (Tàngilàayi lwonji lwàyì, cikisu cyàyì aci.) Bu wèwè ne cyà kutwìpata, kùtùlekèdiku ànu tuya twenda tulalakana mu buloba cyanààna to, bwalu mbikolè bwà kwamba mwaba wutwàyà kabwela mu muntu mukwàbò. Bu wèwè mutwìpate... Tudi baswè kwikala mu muntu kampàndà; tudi baswè kwenza cintu kampàndà; tudi baswè kwenza cingà cintu cyà lwonji." Ke dyabùlù awu's. "Nèmmupingàjilè. Hmm!" Nwamònu anyi? Ke dyabùlù awu's. "Nènjikijanganè nendè." Nwamònu anyi? Vùlukàayi ànu nè, mmwanèènù wa balùme udi mwimàne mwaba awu, kàdi dyabùlù mmumutwè byanza. Nwamònu anyi? "Twènzàayi cintu kampàndà cyà lwonji. Tudi mwà kwenza nè beena Gadara aba bàkèngè bwà bwalu ebu," mùvwa mfùmù wayi mufwànyine kwikala mwambè, umwe wa

ku yôyi. Yèyè nè: “Tùlekèlè tùyekù mu cisumbù cyà ngulube cyàcyà.”

⁸⁹ Yesù wàkamba nè: “Ndaayi. Kàdi pàtukàayi munda mwèndè!” Kaa, ekèlekèlè! Kalùmyànà kakesè kàà mùshindù awu kàakula nè musumbà munène wà badémóns awu. “Pàtukàayi munda mwèndè! Nudi nè dyanyisha dyà kuya.” Ke kubwelayi mu ngulube ayi, nè ke yôyi kubanga kupaluka, kubweja ngulube ayi mu dipaluka. Nènku ke yôyi yiyaaya eyi mitàngila ku musùlù, nè kutùkinayi mu musùlù, kudishipayè mu musùlù amu. Mmwômò anyi?

⁹⁰ Mpindyewu, pàakenzàbo nàнку. . . Mu bushùwà bwà bwalu démons yàkapàtuka munda mwàyi, bwalu yàkashipa ngulube. Cyàkayitùkija mu dipaluka. Yàkapaluka ànu bu muntu kanà yònsò ewu. Nukàadikù bamòne muntu kampàndà ùpeta dipaluka dyà cijji anyi? Èè, aci’s cidi ànu—aci’s ke cidici ànu menemene. S’cidi ànu démons ayi. Ke cidi cimwenzèkèlè. Wèwè mumòne muntu mubindùlùke mu cijji, ambà nè: “Uh huh, mpindyewu ndi mumanyè cyàkenzekà mu Gadara.” Nwamònu anyi? Aci’s ncyôci menemene. Mikwàbò ndambù yôyi ànu midisàkidilamù, yidi yimuvwija mupalè ànu wetù wa menemene ewu; bwalu ngàngàbukà wa maalu à lwondapu neàkwambilè nè cijji ke citùpà cyà kumpalà cyà dipaala. Aci’s ke cidi ba-Mayos bàmba, citùpà cyà kumpalà cyà dipaala.

⁹¹ Mwanèètù Pat, aci’s ncifwànyine kwikala cyakwidi cikàyàbàlè. Ke citàmbe bwîmpè cîndi mèmè mumanyè ncyôci aci, kaciyikù cyà cidyanjila kulongolola to. Èyo.

102. Loomò nshapità wa 7, mvensà wa 25.

⁹² Bikèngela bwà mèmè ku. . . Mvwa mupwè mwoyi, mvwa mucitàngile ditùkù adi pangààcipeci, kàdi ngàpù nè mwoyi cididi menemene. Twàndamunàayi lukonko lwà mukwètù munanga ewu twètù nè mùshindù. Loomò 7.22, èyo, anyi :25, mfwilaayiku luse. Loomò 7. . . Mvwa mubuulùle dyàkàmwè mabèji àbidi dîbà adi. Ke cyàkenza nè cyôci. . .

Ndi nsàkidila Nzambì ku Yesù Kilistò Mukalenge wetù. Pa nàнку aci—nàнку dîbà adi nè meeji—nè—nè meeji ndi mèmè mupika wa mukenji wà Nzambì; kàdi nè mubidi ndi mupika wa mpèkaatù.

Mpindyewu, anji indilaayi kakesè. Ncivwa mucibalè bîmpè to.

Ndi nsàkidila Nzambì ku Yesù Kilistò Mukalenge wetù. Pa nàнку dîbà adi nè meeji. . . (Èyowà’s, ncyà bushùwà). . . Ndi mèmè mwìnè nsadila mukenji wà Nzambì; kàdi nè mubidi mupika wa mukenji wà mpèkaatù.

⁹³ Èyo. Ke cyôci aci menemene cyàkambululà Pòlò misangu yàbúngi. Pàmvwà njinga kwenza bîmpè, bubi bùdi kaaba aka.

Nwamònu anyi? Ke cyôci aci menemene cyûdi wenza wêwê pèèbè. Nè meeji èbè, ke mwoyi wèbè awu's. Nwamònu anyi? Mpindyewu vùlukààyi nè, kwèna wela meeji nè mutù wèbè awu to; nànsha kwèna umòna nè mèsù èbè awu to. Nànsha wêwê kwèna . . . Udi—udi umòna nè mwoyi wèbè. Nuvwakù bamanyè nànkù anyi? Udikù mumanyè nè mwoyi wèbè awu wùdi nè muntu kampàndà munda amu pakuumusha wêwê mwine anyi? Maalu à mamanya mmafùme ku dijandula aci kùkaadi bidimu bitwè ku binaayi, nudi bamanyè's. Kaacibambalu kakesè mu mwoyi, bàdi bàmba nè mmùdi musùùkà musòmbele.

⁹⁴ Ukààdikù muumvwè bààkula bwà kandòndò kàà mwoyi anyi? Udi utwàdija kwenza cintu kampàndà, nè udyàmbedila nè: “Kaa, kabyèna bintonda to,” kàdi kandòndò kèèbè kàà mwoyi aku kàkwambila bishìllàngàne.

⁹⁵ Bàdi mwà kwangata kajandudi kàà dishima . . . Ndi mmòna mulundà wanyì mwìmpè, Ndumbùlùlà Robinson, musòmbe lwà paanyimà. Nènku ncyèna mumanye ní ùkaadikù mucimòne cyenzèke anyi to, kàdi byàkenzeka nè bàcimpèèsha—kuteeta—kucintèèkabò pambidi musangu kampàndà, pa bìdi bitàngilà Mwanjèlò wa Mukalenge ewu. Nènku bàdi bàkutèèka kajandudi kàà dishima pambidi, nè uteeta mu—bwà kutonda nè dyèbè dimanya dyònsò, nè mwèbè mwònsò mùdi mwà kucìvwija amu, ànu cilenga cyà dikèrà nè cilàndakaja bìmpè, bwà nè kùvwa mwenzè cintu *kampàndà* to—mwenzàvi kampàndà. Kajandudi kàà dishima aku nèkààlukile cyànyimà nè kàmba nè udi ushima. Nwamònu anyi? Bwà cinyi? Ndikankakana dyà tujilujilujilu twèbè dídibo bàmmòna pa kajandudi kàà dishima aku. Nwamònu anyi? Neci—necikwambilè. Bwà bwalu kaayi? Muntu kààkenjiibwa bwà kushimayè ku mbandidilu wendè wa ku cibangidilu awu to. Mpèkaatù nè dyabùlù bìdi pambidi pèèbè abi ke bìdi bìkufikisha ku dishima. Nwamònu anyi?

⁹⁶ Wêwè kùvwa—kwèna mwenjiibwe bwà kushima nànsha. Ke bwà cinyi bìdi bikèngela bwà wêwè kwikala cyàkàbìdi nè mwoyi, bwalu uvwa mwenjiibwe, mufùkiibwe bwà kwikala nè mwoyi kashidi, kwikala nè mwoyi kashidi. Kàdi nwamònu's, mpèkaatù wàkabwela nè wàkatwàla lufù mu mubidi. Nènku dîbà adi, pàdi mpèkaatù ùbwela nè ùtwàla lufù mu mubidi, dîbà adi mu bushùwà bwà bwalu, bikèngela bwà mubidi wùfwè. Kàdi wòwò, mwòmò amu mùdi mwà kusòmbela Mwoyi wà Cyendèlèlè, pàdi nyumà ewu ùshintuludiiibwa munda mwèbè nè wêwè upeta Mwoyi wà Cyendèlèlè. Nzambì neàjuulè mubidi awu cyàkàbìdi ku dítùkù dyà ndekeelu. Mmwàmbè nè Yèyè neàcyènzè.

⁹⁷ Pa nànkù nè meeji àànyì—meeji. . . Yèyè mmwàmbè mu mwaba mukwàbò nè: “Ndi ngìtabuuja nè ndi nè meeji à Kilistò.” Mpindyewu, mu meeji awu ke mùdi usadila—nè meeji à Kilistò udi usadila Nzambì. Nwamònu's, citùpà cyà munda aci (nwamònu anyi?), citùpà cyà munda aci, udi usadila

Nzambì. Kandòndò kàà mwoyi aku, ke mwaba ùdi diitabuuja disanganyibwa.

⁹⁸ Ndi muswè kunukonkakù. Kùvwakù bikondo byàbùngì binùvwà nwènu bàdi mwab'ewu aba, bààbùngì bàà kunùdi bàkaadikù bamòne misangu yùdiku mufwànyine—yùdi ànu mumanyè nè cintu kampàndà cìvwa mwà kwenzeka. Bìvwa bimwèka bu nè kabìvwa mwà kwenzekakù to bwà kwenzekaci, kàdi wèwè uvwa ànu mumanyè nè cìvwa nè cyà kwenzeka. Uvwaku kacya mucìpetè anyi? Aci's ke diitabuuja adi, kandòndò kàà mwoyi aku munkaci mwà kukwàta mudimu.

Mpindyewu, kwòkù kwenze luuya ndambù munda emu, nudi mwà kupwekesha kakombo aku lwà kwìnshì aku, nwènu bùmvwèkù luuya lùkaadi lunwèza ndambù.

⁹⁹ Mpindyewu, mwòmò amu kandòndò kàà mwoyi aku (nwamònu anyi?), ke mwaba wùdi meeji ènu... Mpindyewu Yesù wàkamba nè: “Muntu yèyè kàyì mulediibwe cyàkàbìdi to...” (Mpindyewu, aci kî ncìmvwà nkèba to.) “Bulelèlà, bulelèlà, Ndi nnwàmila nè, muntu yèyè kàyì mulediibwe cyàkàbìdi to kèna mwà *kumòna* Bukalenge bwà Nzambì to.” Mpindyewu, kwèna mwà kumòna Bukalenge bwà Nzambì to, bwalu Bukalenge bwà Nzambì n'Nyumà Mwìmpè. “Bàmwè bàdi biimane mwab'ewu kabààkulabula lufù to too nè pààmònabo Bukalenge bülwa mu bukolè,” mwàkambàYe. Pashùshe nè: “Bukalenge bwà Nzambì,” mùdi Bible mwàmbe, “bùdi munda mwènu amu.” Bùdi munda mwènu, Nyumà Mwìmpè, kàdi kwèna mwà kumòna aci nè mèsù èbè to. Pa nàнку *kumòna* mbwena kwamba nè “kuumvwa.”

¹⁰⁰ Ukàadikù kacya mutàngile ku cintu kampàndà, mucitàngile ànu buludi, wamba nè: “Èè, ncyèna ncimòna to.” Nwamònu anyi? “Ncyèna ànu ncimòna to.” Udi uswa kwamba nè kwèna ucyùm vwa to. Nwamònu's, nwamònu anyi? Kwèna ucyùm vwa to. *Kumòna* mbwena kwamba nè “kuumvwa.” Kàdi nè mèsù èbè awu's udi utàngila cintu kanà cyònsò eci. Kàdi nè cìdi munda mwèbè aci, udi umvwa naaci, udi umòna naaci's. Nwamònu anyi? Nè mèsù à Nzambì udi utàngila.

¹⁰¹ Nènku mpindyewu, lamàayi bwalu abu mpindyewu. Ki cintu cyà cilenga cìlwalwà eci panwìkalà badìlongòlòle bwàci: Mwena Kilistò ùdi utàngila bintu bìdiye kàyì ùmòna nè mèsù èndè to (nwamònu anyi?), bwalu tudi tutàngila bìdi kabìyi bimwèka. Nwamònu anyi? Udi ubitàngila bìshi? Nè mèsù èbè à munda awu. Udi ucimòna ku diitabuuja. Nènku mpindyewu, bwà kujaadika aci: byà mvità byònsò byà beena Kilistò mbyenjìibwe nè ngiikàdilù yidi kayiyi yimwèneka ayi. Byà mvità byà beena Kilistò ncinyi? Muntu kampàndà ùdi wàmba nè: “Kumòna nkwitabuuja.” Muntu awu kî mmufwànyinekù kwìkala mwena Kilistò to, bwalu byà mvità byà mwena Kilistò mbyenjìibwe nè eci nùku: dinanga. Nukàadikù badimòne anyi? Nukàadi

badimòne mu cyenzi, kàdi kacya kanùtukù bânji kumòna dinanga to. Wèwè mwà kudimòna, pàtulaaku citùpà cyèbè cyà dinanga aci kàdi mmonè nè cidi bishi. Nwamònu anyi? Dinanga, dinanga, disànka, ditalala, mwoyi mule, bwîmpè, bupòle, diitabuuja—diitabuuja, musàngèelu (nwamònu anyi?); byà mvità byònsò byà mwena Kilistò mbyà kabiyi bimwèka ku mèsù à mubidi aa to, kàdi mbyumvwike ku mwoyi! Ke bwalu mbwòbù abu's. Ke bwalu mbwòbù abu's.

¹⁰² Pòlò wàkamba díbà adi nè: “Nè meeji àànyì. . . (‘Nè mèmè ndi nè meeji à Kilistò,’ nudi numòna’s, mwàkambàye.) Ndi nsadila Nzambi nè meeji àànyì, kàdi mubidi wànyì (mmunyi mwàkacyambàye ku ndekeelu aku?)—kàdi mu mubidi, mupika ku mukenji wà mpèkaatù.” Ncinyi aci? Mubidi wànyì wùdi wàmba dilòlò edi nè: “Udi mucyòke bikolè be. Muminu wèbè wùdi wùsaamakana bikolè. Udi—uvwa mu lupeepèlè leelù ewu. Kwàkuya mu èkèleeziyà dilòlò edi nànsha.” Aci’s mmukenji wà mubidi. “Mbipicìibwe nè wèwè mubàbiiikile kuntwaku nè mwambilè Mwanèètù Neville nè. . . Tùmakù nkonko kuntwaku nè ùmwambilè bwà kuyàndamuna.” Kàdi nudi numòna’s, s’mvwa mulayè bwà kuyàndamuna. Nwamònu anyi?

¹⁰³ Mpindyewu, meeji àànyì, munda amu Nyumà Mwîmpè kwamba nè: “Wèwè lamà mulayi wèbè.”

Kàdi mubidi wàmbi nè: “Wèwè udi mucyòke bikolè be.” Nwamònu anyi?

¹⁰⁴ Mpindyewu, mubidi ùdi wàmba nè: “Mpindyewu, kakwena bwalu to, wèwè kantu kakesè kalenga, wèwè’s ke kantu kakesè kalenga kàdi katàmbè tònsò mu cilongelu. Mpindyewu, kütèyikù ntèmà ní nkùdi mamwèbè munsantu mubunguluki wa mu malaba awu ní nkùdi tatwèbè mukoleshi wa maalù awu to. Nwamònu anyi? Wèwè ki nsongàakàji udi mutàmbe bulenga ku bònsò mu cilongelu.” “Wèwè ki nsongàalùme udi mutàmbe bònsò ku bwîmpè, wa mmwènekèlu mutàmbe bwîmpè, mutàmbe kupàyama ku bònsò. Wèwè ke udi mutàmbe kumanyika udikù mu cimenga emu.” Nudi numòna anyi? Aci—aci. . . Nènku wèwè mulekelela bidimba byèbè ku cyòci aci, díbà adi neupatukilè penyì? Ànu mu dipangila dyà menemene díbà dyònsò. Nwamònu anyi?

¹⁰⁵ Pòlò mmwàmbè nè: “Mubidi wànyì mmuswè—mmuswè misangu yònsò ànu kudilekelela ku cyòci aci.” Nànsha mubidi wèbè kàbidì. Nwamònu anyi? Kàdi mukenji wà Nyumà wa Nzambi mu mwoyi wùdi wùcimuna mubidi nè ùfikisha mubidi ku ditùmikila cidi mwoyi wàmba bwà kwenza. Àlèluuyàh!

¹⁰⁶ Tàngilàayi, díbà adi piikalàci mwà kwenza nànkù bwà ngènzàmpèkàatù, díbà adi aci kacýènakù mwà kukùmbana bwà bubèedi kàbidì anyi? Mukenji wà Nyumà wa Nzambi mu mwoyi wùdi mumanyè nè “Ku mibùndàbùndà Yèndè twàkondopiibwa,” bàdi biimana nè bukolè bwàbò nè bàfikisha bubèedi bùvwà mu

mubidi awu ku dibàtùmikila, bwalu ndyabùlù. Ke bwalu abu's. Yöyöyo! Acì's ncibwikila kùdì busùkùsùkù bwà mabèèle mòna mupimbu. Ndi nnwàmbila. Ke cyôci aci's. Nwamònu anyi?

¹⁰⁷ Mpindyewu, mukenji wà mpèkaatù nè lufù bìdi bikwàta mudimu mu mubidi wèbè, kàdi mukenji wà Nyumà wa Mwoyi wùdi wùkwàta mudimu munda mwà mwoyi wèbè. Pa nàнку mwoyi wèbè, nyumà webè munda mwà mwoyi wèbè's neàfikishe mubidi wèbè ku ditumikila cidìyi wàmba bwà kwenza aci. Ncyà bushùwà menemene. Mpindyewu, ke cyàkambà Pòlò ncyôci aci. Misangu yònsò mubidi nè: “Ndi mucyòke bikolè be; ncyèna mukùmbàne to; ncyèna mukùmbànyine to; ncyèna mwà kucyèna to.”

Mèmè kwambila—kwambila Loyce anyi—anyi Delores, anyi muntu kampàndà uvwa uyiikila naanyi bwà Nyumà Mwímpè, pa cintu kampàndà anyi cikwàbò cyà mùshindù awu, mèmè kwamba—kwamba nè: “Ncinyi. . .”

Delores kwambayè nè: “Ncinyi—ncinyi civwà cimfikishe ku didyùmvwa mùshindù awu ànu pa díbà divwàbi bikèngela bwà mèmè kudyùmvwa bìmpè adi?”

¹⁰⁸ Mèmè nè: “Dyabùlù. Mmukumòne ànu pabwîpì nè kuMupeta. Yèyè nè: ‘Nèmmutèèkèku ndambù wa mutaleela pambidi: Pwàà! Mmupùpishèku ndambù mukesè, nudi bamanyè's, kwenza bu mumutalàje ndambù.’ Nwamònu anyi? Kàdi kaa, ekèlekèle, díbà adi's ke dyùvwà kujuuka's! Kunana makenji èbè makupà kùdì Nzambi.” Ke civwà Pòlò muswè kwamba ncyôci aci. Nwamònu anyi? Kùdì. . . “Misangu yònsò pàndì,” mwàkambàye, “pàndì nswa kwenza maalu mímpè, bubì bùdi kaaba aka.”

¹⁰⁹ Nènkwabìlè cyùdì wèwè wenza. Ngàmònu cyôci eci, mukàjàànyì nè mèmè. . . Nèнку nèndwìjakajè bwà kwalukila, bwalu ncicidi ànu nè ndambù wa tusunsa, nè ndi nè ndambù wa nkonko minène kaaba aka. Ncyèna muswè kunùlama too nè pashìishe to, kàdi ndi muswè kwandamuna nkonko yènu ayi nè mwànyì pàànyì mwònsò.

¹¹⁰ Mònaayi's! Ndi mwà kubanga mu dindà, nè kwamba nè nyààya, Mukalenge mmundombòle bwà kuya ku mwaba kampàndà bwà disangisha, èè, mwanèètù, udi ànu umòna mùdì bintu byònsò byènzeka. Anyi nùndekèle ngààlukilè kwànyì kumbèlu, nè dibìikila kampàndà dyà ntàntà mule díbwela. Mpindyewu, bikèngela nsambidilè babèèdì. Joseph mwànà ewu neàmbànde pa nshìngù. Sarah neàjinge kungeela lukonko kampàndà. Becky neabangè kwimba pyànò. Mèmè kwamba nè: “Sh, sh, sh!” Mèmè kwela cyanza muulu nè: “È, sh, sh, sh, ndi nè cyà—Papa ùdi nè cyà kusambidila babèèdì.”

“Èè, Papa, tàngilà; Joe mmwenzè cikampàndà. . .” Nudi numòna anyi? Cìkùtuka ànu's. Nèнку pàdì ànu disambila dijika,

bàdi bàngàta tuntu twàbò twà manàyi atu nè bàkùtula dinàya nè kalolo kònsò. Aci's ndyabùlù. Ncyà bushùwà nè nyèyè.

¹¹¹ Nè pashiishe nêensemenè mwaba awu ngàmbe nè: “Joseph, kabivwa bikèngela bwà wèwè kwenza cintu *kampàndà* to.” Kàdi nudi bamanyè's, katanci aka, cyumba cishààla ciibidilu kampàndà. Nènku nenùsanganè mu bânà bèènu balela amu nè, nebànùshimè. Èè, awu's nnyumà wa mashimi pa mwànà awu. Kùdi bwanga ànu bùmwèpelè bwà cyôci aci. Lukodi kí ndyandamuna bwànyì mêmè to, nudi bamanyè's, munyànzù wùvwàbò bàtùnyàkula pa ciibidilu awu, Mwanèètù Jess. Patùvwa twenza—twenza—twenza bubu tuvwa nè ciibidilu cyà kwangata kalonda kàà cingoma, munyànsù wà ditàmbe dyà mucì wà hickory, nudi bamanyè's, bingoma byà kale byà pùùpùùpù bìvwàbò bàsoma nè mfwekète nè milonda abi. Aci kí ndyandamuna to. Kàdi disambila, didi diipata démon mubi awu kule nè mwànà awu. Ncyà bushùwà. Disambila didi dyènza nànkù.

¹¹² Martha mwànà awu yèyè mubange kutuuta tukàsà twèndè atu panshì, nè ùnyeemakana eku nè eku, nè wèla tushikù twèndè atu mu dyùlù, udi mufwànyine kumutuuta mu mùshindù wà kàyì ùshààla nè bilàmbe pambidi to; nèàcyènze ànu kucyènza nànsha bishi. Kàdi shààla wèwè kumpàlà kwà Nzambi nè ùnanè musùukà wà mwànà awu bwà Nzambi. Shààla wèwè ànu nendè mwaba awu. Ndi ngèèla meeji nè ke cintu cidì citàmbe bwímpè cindiku mumanyè. Èyowà's, mukalenge! Ke bwanga bwà butàmbe bwímpè bündiku mumanyè, ndisambila.

103. Mpindyewu, tùmônààyibi. Mpindyewu lùdi lùlondà kaaba aka lùdi lwàmbe nè, **Ncinyì cidì didyànjila-kulongolola kumpàlà kwà dyulu nè buloba kubangabi kumvwija; cidì penyì mu Bible?** Didyànjila-kulongolola kumpàlà kwà dyulu nè buloba kubangabi.

¹¹³ Èyo, mulundà wanyì wa mushinga mukolè, tùbuululàayi mu Efèsò nshapità 1 ànu bwà mwaba wùmwèpelè cyanààna. Ndi ngèèla meeji nè katwàkunènga bikolè menemene pa elu to, ànu lwólò kalùyì lwandàmùnyìlwe mu mùshindù mujaalame nànsha. Nènku túbangilàayi ànu kubala kaaba aka mu Efèsò nshapità 1.

¹¹⁴ Mpindyewu, cintu cyà kumpàlà, ndi muswè kwamba nùnkù ewu: nè *didyànjila-kulongolola* adi mmwàkù mubi bwà mwambi ku—kuwàmbayè kumpàlà kwà disangisha didi kadiyì dilongèshìlwe. Nwamònu anyì? Mmwómò. Mémè ncitu ngwàmbe to. Misangu mikwàbò ku èkèleeziyà eku . . . Kàdi mu batèeleji bàà pambèlu, myaba yà minène . . . Mùdi—bintu byònsò bipàyamù mishikì byà ku bintu byònsò, Ntu ntàbaleela mwàkù awu. Ntu misangu yònsò ànu ngàngata mwàkù wà *didyànjila-kumanya*, bwalu didyànjila-kulongolola didi ànu didyànjila-kumanya dyà Nzambi. Bu mùdi Nzambi mwikàle kàyì mikàlù,

ku didyànjila-kumanya Ûvwa mumanyè bintu byònsò, cyanààna Yèyè kî ng'wa kayi mikàlù to. Nwamònu's, nwamònu anyi? Ûvwa mumanyè civwà mwà kwenzeka. Pa nàнку ku didyànjila-kumanya Yèyè ùvwa mwà kudyànjila-kulongolola. Ke bwà cinyi ndi ngiitabuuja nè Nzambi—nè Nzambi kèna ànu . . .

115 Mwenze ànu bu mùdi lupeepà lúdi upuuyakana alu; Ncyèna mpetangana nè Bantèmù bàà Yehowàh pa mmwènenu awu wa nè mweyelu wèbè awu ke nyumà webè. Kacyèna mwà kwikala nàнку to. Nwamònu anyi? Nyumà webè ùdi mu mwoyi wèbè. Nwamònu anyi? Nènku udi upeta nyumà webè awu kumpàlà mene kwà wèwè—kulwa pa buloba. Nzambi wàkambila Yelèmìyà nè Ûvwa mumumanyè, nè kumujidila, nè kumuvwija mupròfetà pa ditungà—pa matungà kumpàlà mene kwà kwimiciibwayè mu difù dyà mamwèndè (nwamònu anyi?), Yelèmìyà 1.4.

116 Mpindyewu mònaayi. Pa nàнку tudi tumòna nè bintu byònsò ebi ndidyànjila-kumanya. Bidimu nkàmà mwandamutekète nè dikùmi nè bìbìdi kumpàlà kwà Yesù kulediibwayè—kumpàlà kwà Yone kulediibwayè, Yeshààyi wàkamumòna mu cikèèna-kumòna, kwambayè nè yèyè ùvwa díyi dyà ewu udi wela lubilà mu cipèèlà—bidimu nkàmà mwandamutekète nè dikùmi nè bìbìdi. Kubangila ànu ku budimi bwà Edèna, Yesù Kilistò, kumpàlà kwà difùkà dyà dyulu nè buloba . . .

117 Mmunyi mùvwà . . . ? Tùbalàayi eci. Efèsò 1, tùbangilàayi ànu ku nshapità 1 bwà—anyi ku mvensà 1.

Pòlò, mùpostòlò . . . (Mpindyewu tàngilàayi nùmonè mùdiye wàmba cyòci eci. Mémè ntu munangè mùshindù wà Pòlò ewu. Ntu munangè Pòlò, kàdi nwènù? Kaa yèyè's ùvwa musadidi mulenga wa dikèma wa Kilistò. Mpindyewu tàngilààyaaku eci.)

Pòlò, mùpostòlò wa Yesù Kilistò ku diswa dyà Nzambi, kùdi bansantu bàdi ku Efèsò, nè . . . beena lulamatu mu Kilistò Yesù.

118 Mònaayi nè, eci kî ncyambila bàà pa buloba to; eci kî ncyambila beena pambèlu to. Eci cidi bwà Èkèleeziyà udi mu Yesù Kilistò (kaa, aci kî ncilenga anyi?), Èkèleeziyà mu Yesù Kilistò. Aci's . . . Mpindyewu mmunyi mùdi ubwela mu Yesù Kilistò? Ku Nyumà umwèpelè nkutùdi bònsò babàtiijibwe mu Mubidi wùmwèpelè. Mpindyewu—mmunyi . . . Nè—nè yèyè ùdi ùludikila eci kùdi bantu bàdi bùle tètè nè Nyumà Mwimpè (nwamònu anyi?), kî nkùdi bantu bàà pambèlu nànsha.

Ngàsà ikalè kunùdi, nè ditalala, byà kùdi Nzambi Taatù wetù, nè byà kùdi Mukalenge Yesù Kilistò.

Nzambi Taatù wetù—Nzambi nè—Taatù wetù wa Mukalenge wetù Yesù Kilistò àbèneshiübwe, yèyè

udi *mutùbènèshe* mu myaba *yònsò* yà mu dyulu—nè *mabènèsha à nyumà mu myaba yà mu dyulu mu Kilistò!*

119 Kaa, ekèlekèle! Kwènàku muswè bwà kusòmba mu wùmwe wà ku yòyi ayi anyi? Èè, twètù tudimù. Bushùwà's! Nyumà Mwímpè umwèumwè awu. Yèyè kwamba mpindyewu, bu munùdi basòmbè pàmwè mu myaba yà mu Dyulu *mu Kilistò* Yesù, Nzambi mmutùbènèshe nè mabènèsha *ònsò* à nyumà, Mwanèètù wa bakàji Rose. Ndi ngèèla meeji nè—aci—aci's... Ncivwa—ncivwa mwà kuvùluka dìnà dyèbè ditùkù adi to. Ndi ngèèla meeji nè uvwa mu mulongo wa babèèdi anyi cintu kampàndà. Nènku ndi—ndi mvùluka nè mvwa nteeta kudivùluka pashùshe, nè ndi—kàdi dyèbè udi Rose Austin, kî mmwòmò anyi? Ndi muvùl-... Kale wàwa uvwa ulwa ku tabernacle eku dībà dyònsò. Mmwòmò. Èyo. Mpindyewu:

Nzambi wa—wa wetù Taatù àbèneshiibwè... Yesù Kilistò, yèyè udi mutùbènèshe nè mabènèsha ònsò à nyumà... ònsò à nyum-... mu myaba yà mu dyulu... (Tùmonèbi ní ndi mbala aci—ncitèèla bimpè.)

Nzambi nè Taatù wa Mukalenge wetù Yesù Kilistò àbèneshiibwè, yèyè udi mutùbènèshe nè mabènèsha ònsò à nyumà mu myaba yà mu dyulu mu Kilistò Yesù: (Badisangishe pàmwè mpindyewu mu myaba yà mu dyulu mu Kilistò Yesù.)

Bilondèshile mùdiye... (Mpindyewu tèèlejàayi! Nwènù bònsò nudi pabwipi anyi?)... Bilondèshile mùdiye mutùsungùle munda mwèndè kumpàlà kwà... (Mémè kunùyiisha.)... kumpàlà kwà difùkà dyà dyulu nè buloba,...

120 Mpindyewu, nwamònu's, yèyè ùdi mwà kwakula nè Èkèleeziyà. Kàvwa mufwànyine kwambila bânà bàà mu mabòkò aci to, kàdi ùdi wàkula nè Èkèleeziyà ukàadi mumanè kwikala mu Kilistò. Mpindyewu, yèyè kàvwa mwà kupàtuka ànu apa kuya ku èkèleeziyà kampàndà kwamba nè: “Èè mpindyewu, *cikampàndà*.” Abu's mbasungula bàdi mu Kilistò Abu.

121 Mpindyewu, wèwè udi wamba nè: “Èè, mémè ndi ngùtabuuja nè ndi munda mwà Kilistò.” Byòbi nànkù, udi mupeètè Nyumà Mwímpè, bwalu ke mùshindù wùmwèpelè wùdiku mwà kubwela mu Kilistò awu. Kolintò wa Kumpàlà 12.13 (nwamònu anyi?)—Kolintò wa Kumpàlà nshapità wa 12. Èyo. “Bwalu ku Nyumà umwèpelè nkutùdi bònsò babàtùjùibwe mu Mubidi wùmwèpelè (wùdi Mubidi wà Kilistò awu).” Mpindyewu! Dībà adi tudi tusòmba pàmwè mu myaba yà mu dyulu nè diyì dimwè (Hmm!), Nyumà Mwímpè mwikàle ùkwàta mudimu munkaci mwètù, ùtùlongesha, ùtùleeja bintu binèna, ùfikisha bintu ku dnyezekabi. Kaa, mwaba kaayipu's wè!

122 Yèyè kwamba nè: “Mpindyewu, nwènù bàdi babiikidiibwe mùshindù awu abu, ndi muswè kwakulakù neenù, nwènù,

basungula abu. Bwà nè Nzambi wàkatùsungula munda Mwèndè kumpàlà kwà difùkà dyà dyulu nè buloba.” Anji elàayiibi meeji ku bwalu abu. Nzambi mmutùsungùle munda Mwèndè kumpàlà kwà difùkà dyà dyulu nè buloba. Nzambi ùvwa mumanyè kumpàlà kwà difùkà dyà dyulu nè buloba nè ndi mufwànyine kwakula pa cyena-bwalu cimwècimwè eci dilòòlò edi. Yèyè kèna nè mikàlù to. Nè kumpàlà kwà kwikalakù dyulu nè buloba. . . Kaa! Yöyöyò! Apa, petàayi Nyumà Mwímpè mpindyewu. Dìyi nedìMutwàlè. Nwamònu anyi? Ke mùshindù wùdìYe ùwa awu: “Pàcìvwà ànu Peetèlò wàkula mèyi aa Nyumà Mwímpè wàkapòna pambidi pààbò.” Nwamònu’s, nwamònu anyi?

¹²³ Kumpàlà kwà kwikalakù dyulu nè buloba wèwè uvwa mu meeji à Nzambi bwà kukupèèsha Nyumà Mwímpè, bwalu Yèyè ùvwa mumanyè nè wèwè uvwa mwà kuMujinga; nè Yèyè wàkakusungula Yèyè mwinè bwalu uvwa ujinga. . . Yèyè wàkakusungula mu Kilistò kumpàlà kwèbè anyi Yesù, yònsò wa kunùdì, kwa wèwè kwikala pa buloba. Ke kutùmaYè Yesù bwà kufwà, bwà kulongolola njila bwà kutùma Nyumà Mwímpè, bwà kukufikisha kùdì Yèyè mwinè. Hmm! Kaa, aci cidì ànu. . . Ndi mumanyè nè ndi mwà. . . Ewu’s ng’èkèlèeziyà, pa nàнку ndi kwànyì kumbèlu mpindyewu, nudi numòna’s. Kaa, aci’s ncibanjike bikolè be bwànyì mèmè. Pa kwela meeji nè kí ncìmvwà muswè to; kacìvwà majinga àànyì to; kacìvwà diswa dyànyì to; kacìvwà disungula dyànyì to; ncìvwakù naaci bwalu nànsha bùmwè to. Kàdì kumpàlà mene kwà dyulu nè buloba kubangabi, Nzambi wàkatùmòna nè kufùnda dìnà dyètù mu Mukàndà wà Mwoyi wà Mwànà wa mùkòòkò. Kumpàlà mene kwà kwikalakù dyulu nè buloba! Wèwè ùdì wàkùla bwà Nzambi’s! Yöyöyò!

¹²⁴ Mwva mwimàne kuntu kwàka kùvwà tulondo tunène atu. . . Nudi mwà kumòna ntàntà wa bidimu mìlìyò lukàmà nè makùmi àbìdì byà bukènkè mu cibwàshìbwàshì. Pangàakatàngila nè kumòna aci (ncyàkapeta mwà kumwèna mu tulondo atu to, kàdì ngàkàmòna cimfwànyì mwaba wàkacìkwàcìlàbo)—nèku ke kunkèngelabi ànu bwà kwela byanza muulu muntwamu, mu mwaba awu, ke mèmè kwamba nè: “Mùshindù mwinè Wùdì munène’s wè, mùshindù mwinè Wùdì munène’s wè!” Nèku bangabanga mene nè mabùlungà aa kutwàdijawù kunyunga (Àlèluuyàh!), Nzambi mmutùsungùle mu Yesù Kilistò. Mpindyewu, mùshindù mwinè Wùdì munène’s wè. Èyowà’s, mukalenge!

¹²⁵ Kumpàlà kwà kwikalakù dyulu nè buloba, kumpàlà kwà kwikalakù dibùlunga kampàndà, kumpàlà kwà kwikalakù dibà, kumpàlà kwà kwikalakù ngondo, kumpàlà kwà kwikalakù bukènkè, kumpàlà kwà kwikalakù ní ncìnyì cyònsò, pàcìcìvwàku ànu Nzambi, Nzambi nè meeji Èndè, meeji à cyèndèlèlè à Nzambi àkakusungula ku didyànjila-kulongolola, ku didyànjila-kumanya, bwà kumanya nè wèwè uvwa mwà

kwikala pa buloba, bwà kumanya nè nekwikale mpèkaatù.

¹²⁶ Muntu kampàndà wákamba nè: “Dìbà adi, bwà cinyi kùvwà—bwà cinyi kùvwà mpèkaatù?” Bu nè kacya kakùvwakù mpèkaatù to, byambiibwà Byèndè nùнку kì kàbivwa bifwànyine kwikala Musùngidi to. Byàkakèngela bwà kwikalè ngènzàmpèkàatù bwà Yèyè wàmòna mwà kwikala Musùngidi. Byàkakèngela bwà kwikalè mubèèdi bwà Wàmòna mwà kwikala Mwondopi. Amen! Kì bwalu mbwòbù abu’s. Bivwa bikèngela kwikalabi mùshindù awu. Ûvwa n’Nzambi uvwa—uvwa mucimòne nè mudyànze kucilongolola awu. Dyabùlù kèna nànsha mu lubilu alu to. Kaa, yèyè’s ùdi ànu cikuuku ku luseke lwà njila cyàkakwàtà Nzambi naaci mudimu bwà kuMutwàdila bânà abu, bèèla mbilà nè: “Abba, Taatù.” Kabyàkukèmesha mu ditùkù adi mwikala Banjèlò mwà kwimba’s! Patwikala twimba myandà yà bupikudi, Banjèlò nebiiinyikè mitù yàbò; kabàyi bamanyè citùdi twamba aci to. Bushùwà’s! Kacya bôbò kabàvwakù bajimìne to. Kì mbamanyè nè ncinyi to. Kì mbamanyè mutùdi tudyùmvwa bimpè to, bwà kumanya nè twètù bàvwàku musangu kampàndà wàwa bangènzàmpèkàatù nè benyi kùdi Nzambi, katùyi ditèkemena, katùyi luse, katùyi nè Nzambi mu buloba bwà dinyanguka, tupunga nè lufù, munkaci mwà kuya mu ifernò wa dyabùlù; kàdi Nzambi wàkinama panshi, nè kutwàngula, nè kutùpikula; nè mpindyewu tudi kumutù kwa Banjèlò. Mpindyewu mene!

¹²⁷ Nnganyi’s? Mwanjèlò yèyè’s mmwena mudimu. Twètù tudi bânà bàà balùme nè bàà bakàji. Udi mutwibwe mushinga mutàmbe nganyi’s, mmusadidi webè anyi mwan’èbè wa balùme anyi wa bakàji awu? Kaa, ekèlekèle! Disambila dyà kùdi munsantu nediiikalè ditùmbùke misangu mùliyò mujimà kutàmba Mwanjèlò (èyowà’s, mukalenge!), bwalu yèyè mmwànà wa balùme. Kaa, yòyòyò, ncyà bushùwà, mwanèètù wa balùme, mwanèètù wa bakàji.

¹²⁸ Kwèna . . . Èkèleeziyà . . . Ncyèna ngèèla meeji nè elu luseke lwà—lwà cyendèlèlè mutwikalàku mwà kumanya nè cyùdi ncinyi to, mwaba wùdi awu, wùdi Nzambi mukutèèke, nwènù bàdi bùle tètè nè Nyumà aba. Nudi bânà bàà Nzambi. Mòna’s, Mwanjèlò’s mmusadidi. Wèwè udi mwànà! Mwanjèlò ùdi ànu mwà kukutwàdila mukenji cyanàànà, kàdi bidi bikèngela bwà wèwè kwenza maalù. Amen! Wèwè ke mwenji wa dinàya mu cyalu. Wèwè udi mwànà. Mwanjèlò mmusadidi webè, bwà kukutwàdila mukenji, kwamba nè: “Mòna, ndi mukutwàdile mukenji ewu bwà wèwè kwenza *cikampàndà*. Eci ncyà kùdi Taatù. Ndi nkutwàdilaci.” Èyowà. Kì cyònsò cidiye aci’s. Amen! Nwènù nudi bânà bàà balùmè nè bàà bakàji bàà Nzambi. Mmudyànjile kutùlongolola’s! Mpindyewu, tàngilàayi ànu katanci kakesè cyanàànà.

Bilondèshile mùdiye—mùdiye mutùsungùle . . .
(Mpindyewu, twètù katwèna basungùle to . . . Mmunyi)

mûmvwàku mufwànyine kuMusungula? Kùkaadi miliyaalà nkàmà yinaayi, miliyò, miliyàlà, binunu byà miliyàlà byà bidimu, mmunyi mûmvwà mwà kuMusungula? Kàdi Yèyè ngudi munsungùle. Amen! Kaa, Mwanèètù Wood, ki cyôci aci. Wamònu anyi?) . . . *mutùsungùle twètù munda mwèndè kumpàlà kwà difùkà dyà dyulu nè buloba, bwà twètù kwikala bàà cijila . . .* (Mpindyewu, kùteeci kudivwija nàнку wèwè nkàayebè to, bwalu kwèna mwà kukùmbana to.) . . . *nè katùyi kadyuwù kumpàlà kwèndè mu dinanga:*

Kaa, mwanèètù, aci's necyàndamunè lukonko lûmvwà mumòne mwab'ewu kùkaadi ndambù wa tusunsa. Mwaba kampàndà mvwa—mvwa mulùmòne ànu . . . Kaa, èyowà's.

Wèwè wakamba nè . . . Mmunyi mùdi muntu mufwànyine kwikala nè nsòmbelu kumutù kwà . . . kwikala nè nsòmbelu wa sheemàsheemà nè Nzambi, mufwànyine kwikala kàyì nè mpèkaatù?

Tèelejàayi eci:

. . . wa cijila . . . kacya ku difùkà dyà dyulu nè buloba, bwà twètù kwikala bàà cijila nè katùyi cyà dibandiibwa kumpàlà kwèndè mu dinanga:

¹²⁹ Dinanga Dyèndè ndyàkacyènzà. Dinanga dyèndè dyàkafuta bwà mpèkaatù yànyi. Dinanga dyèndè ndyàkayùmushà. Dinanga ki dikàndà didi ditàmbe bukolè didiku. Angàtàbi mulùme udi munangè bulelèlà mukàjèndè, s'ùdi mwà kufwà bwèndè nè budiswile bwònsò. Nè dinanga dyà bwànà bwètù . . .

¹³⁰ Kuvwa muntu kampàndà, muntu kampàndà, ùlwa ku èkèleeziyà ewu ku musangu nè ku musangu, ùfùmina mu ditùnga amu. Ùvwa musòmbe kwà mwanààbò wa balùme ditùkù adi. Kwambayè nè "Amba tũng bu cintu kampàndà mwà kwenzekela Mwanèètù Bill?" Yèyè nè: "Nè disànkà dyònsò ndi mufwànyine kutàdika cyàdi bwà kungaasàbò dìzajì bwèndè." Nwamònu anyi? Kufwà bwà bwalu bwèbè. Ke dinanga ndyòdi adi. Kakwèna dinanga ditàmbe bunène kutàmbe dyà muntu ùtèèkà mwoyi wèndè panshi bwà—bwà mwanààbò to. Nwamònu anyi?

¹³¹ Dinanga, kutùsungula mu dinanga kumpàlà kwà difùkà dyà dyulu nè buloba. Mpindyewu tàngilàayi's:

Mudyànjile kutùlongolola . . . (Mpindyewu, ke mwàku mudyànjila kulongolola ngwòwò awu.) . . . *Mudyànjile kutùlongolola ku ditèèkùbwa dyà bàna kù Yesù Kilistò kùdiye yèyè mwinè, bilondèshile—bilondèshile disànkà dìmpe dyà diswa dyèndè.*

¹³² Udi wamba bishi bwà aci, Mwanèètù Mike? Abi kí mbilenga bilayà anyi? Yèyè's ùvwa mukunangè. Ùvwa mukunangè kumpàlà kwà kwikalakù dyulu nè buloba. Yèyè uvwa mumanyè ngiikàdilù webè; Yèyè ùvwa mumanyè butekètè bwèbè; Yèyè

ùvwa mumanyè biibidilu byèbè. Yèyè ùvwa mumanyè byònsò bidì bikutàngila, cyúvwà mwà kwikala. Nènku díbà adi, pààkatàngilàYe mu cibwàshibwàshì cinène amu, mùtùdi mwà kwamba, Wàkamba nè: “Ndi nkusungula.” Nè pààkenzàYe cyòci aci, kumpàlà mene kwà kwikalakù kapesè kàà–kàà bukénké kampàndà, díbà adi udi wa cyendèlèlèlè pàmwè nè Nzambi. Paùdi upeta Nyumà Mwímpè, díbà adi udi ulwa wa cyendèlèlèlè, bwalu udi nè—udi nè Nzambi, udi citùpà cyà Nzambi. Nudikù mwà kumòna cìndi njinga kwamba aci anyi? Wèwè udi wa cyendèlèlèlè ànu mùdi Nzambi amu, bwalu udi . . .

133 Mémè ndi Branham ànu mùvwà taatù wanyì mwikàle Branham amu, bwalu ndi mashi à Branham kampàndà. Mémè ndi Branham pàmwè nè taatù wanyì, bwalu ndi mulediibwe kùdi taatù wanyì. Ndi Branham pàmwè nendè. Wèwè udi Wood, bu mùvwà tatwèbè mwikàle Wood. Udi Wood ànu mùdi Jim Wood amu; cibì wèwè udi Banks Wood. Amen! Kaa, ekèlekèle! Wèwè udi Neville bwalu tatwèbè ùvwa Neville. Wèwè udi Neville ànu mùvwàye Neville amu. Butùmbi’s wè! Tudi bàà cyendèlèlèlè ànu mùdi Nzambi amu, bwalu tudi citùpà cyà Nzambi, bàà bàà balumè nè bàà bakàji bàà Nzambi, tudi nè Mwoyi wà Cyendèlèlèlè, nè katwèna mwà kufwà nànsha. “Mémè nèmubiishè ku lufù ku ditùkù dyà ndekeelu.”

134 Kabyèna bikèmesha to pàvwàbo pabwípi nè kukòsa mutù wà Pòlo kuntwaku . . . Bivwa bikèngela bwà kwendelayè mu njila wa lufù awu. Wàkafùndila Timòtè mukàndà wà ndekeelu awu, wàmba nè: “Ndi mulwangàne mvità mímpè; ngájikiji lùbilu lwànyì; Ndi mulamè diitabuujà! Kubangila ku mpindyewu kùdi cifulu cyà butùmbi ciindamina cìikalà Mulumbulwishi mwakàne mwà kumpèèsha mu ditùkù adi, kabìyi ànu bwànyì mémè to, kàdi bwà bònsò bàdi banangè dimwènèka Dyèndè.”

Pashìshe lufù kwambalù nè: “Ndi ndumatangana neebè.”

Yèyè ne: “Kalonda kèèbè kàdi penyi?”

Lukita kwambalù nè: “Nènkupetè.”

135 Yèyè nè: “Bucìmunyi bwèbè bùdi penyi?” Kàdi yèyè ùvwa nè cileejilu. Yèyè kupingaja mèsù paanyimà ku Kàlvariyò kwamba nè: “Kàdi twasàkidila kùdi Nzambi udi utùpèèshila bucìmunyi ku Mukalenge wetù Yesù Kìlistò.” Ke bwalu mbwòbù abu. Hmm! Cidi cijuula masaluka; cidi ànu nè cyà kwenza nànkù.

136 Mwoyi wùdi . . . Dìyì didi munkacì mwà kupàtuka. Mwoyi, dìyì dyà mwoyi didi dikwàta Mwoyi, nè munda mwà muntu amu bikèngela cintu kampàndà cyèlè mbilà mikolè.

Nudi bamanyè’s, muntu kampàndà wàkamba nè: “Billy, ncinyì cidi cyènza nè bantu bàjùùkè kuulu nè bèlè byanza byàbò muulu anyì bàmba nè: ‘Mukalenge àtumbè!’ anyì ‘Amen!’?” Tàngilàayi cidi Bible wàmba.

137 Pòlò mmwâmbè nè: “Twètù baakùle mu myakulu myenyi, mmunyi mùdi udi kàyì mulongeshiibwe. . .Piikalàye mubèneshiibwè—bu yèyè mwà kubeneshiibwa, mmunyi mùdiye mufwànyine kwamba nè: ‘Amen?’” Nwamònu anyi? Bikèngela ùmanyè cyùdi wamba aci. Myakulu myenyi, ambà ànu ciikàle ku dyandamuna anyi dibuulula. . .Dibà adi yèyè’s ùdi mwà kwamba nè: “Amen!” bu yèyè mwà kucyùmva. Yèyè mmumanyè cidìye wamba. Nwamònu anyi?

138 Mpindyewu! Kaa, ekèlekèle! Tàngilàayi kuntu kwàka ditùkù adi pàvwà mwena lukunà ùwelela Davidi apu. Nè wàkabàpèesha bònsò kàlàngi kàa mvinyò nè—nè dibùlù dimpè dyà—dyà munyiinyi nè dyâmpà. Nènku—nènku pàvwà mwena lukunà ùlwa, kabàvwa bamanyè cyà dyenza to; ke kudisangishabò muntwamu; nènku Izalèlèlè mujimà wàkadisangisha pàmwè mu ditengudiibwa. (Mpindyewu, eci nku ditengudiibwa dyà kale dyà beena Yudà.) Ke kwelabò byanza byàbò muulu è kwambabò nè: “Nzambi, Wèwè udi Nzambi wetù. Wèwè ngudi mutùkùbe. Wakatwàla Mòsa mupròfetà, nè Wakapàtula bânà bàà Izalèlèlè mu Èjiipitù. Wakabàtwàla kupicila mu cipèlèlè cijimà amu. Pàvwàbò balàadika mwaba awu, muntu nànsha umwe kàvwakù mwà kuumvwa bwôwà bwà—Bantu bònsò bàakaciina bwà kubalenga, muntu nànsha umwe kàakaseemenakù pabwipi nè bumpyanyi Bwèbè abu to. Bàvwa nè bwôwà bwà kuseemena.” Kàdi pààbò’s bàvwa banyàabanyà, kàdi bantu bònsò kabàakabalenga nànsha. Bwalu cintu cyònsò cyàkabalengà, bàakacisuma è kucyàluja paanyimà. Wàkamba nè: “Kaa, Wèwè udi Nzambi munène kaayipu’s wè! Mpindyewu, Mukalenge, patwikalà benze mpèkaatù. . .Bakàji bèètù mbòbò aba; bânà bèètù bakesè mbòbò aba; nè tudi mu dikèngà pa dibà edi.” Yèyè nè: “Kaa, citùdi mwà kwenza ncinyi? Mwena lukunà nyèyè ewu ùlwa.” Yèyè nè: “Citùdi mwà kwenza ncinyi?”

139 Nènku pàvwàbò munkaci mwà kusambila apu Nyumà kutùlulukila muntu kampàndà mu batèeleji amu, è kwambayè cipròfetà nè: “EMU MMÜDÌ MUKALENGE WÀMBA, kanwàkulwangana mvità to; shàalaayi bapùwe! (Amen!) Pwekèlaayi ku njila *kampàndà* bwà nukatwilàngànè naabò kuntwaku.” Kàdi Yèyè kutwàla cimvundù munkaci mwàbò, è kushipanganabò muntu nè mukwèndè. Hmm! Ki bwalu mbwòbù abu’s. Badyànjila kulongolola bwà kwikala basungula mu Kilistò Yesù kumpàlà kwà difùkà dyà dyulu nè buloba. Mpindyewu.

104. Wèwè wàkamba nè muntu ùdi mwà kwikala nè nsòmbelu wa pabwipi menemene nè Nzambi mu mùshindù wa kàyì mwà kwenza mpèkaatù pàdiye pànu pa buloba apa to. Dibà adi umvwijaaku Yone wa Kumpàlà 1.8 too nè ku 10.

140 Twànjàayibi kumòna Yone wa Kumpàlà 1.8 too nè ku 10. Bu nè mvwakù nè ndambù mukwàbò wa dibà bwà kutàngila

byòbì ebi...Mvwa naadi, kàdi ncivwa ànu mudyàngàte to, balundà bàanyi. Mvwa—mvwa nteeta bwà—bwà kupàtuka... Èè, nêmpetè Yone paanyimà pàà katanci. Neciikalè—neciikalè ku luseke lukwàbò lwà Ebèlù, mu bushùwà bwà bwalu. Èyo. Yone wa Kumpàlà 1.8 too nè ku 10—Yone wa Kumpàlà 1.8 too nè ku 10.

Twètù twamba...katwèna nè mpèkaatù to, tudi tudidinga twètù biinè, nè bulelèlà kabwèna munda mwètù to.

Twètù batonde mpèkaatù yètù, yéyè ùdi nè lulamatu nè mvakàne bwà kufwà luse...mpèkaatù yètù, nè... kutùkezula ku bubì bwònsò.

Twètù twamba nè katwèna benzè mpèkaatù to, tudi tumuvwija mwena mashimi, nè dîyi kadyèna munda mwètù to.

¹⁴¹ Èè mpindyewu, anjì indilàbi mwanèètù wanyì munanga. Buulùlaayi ànu mu nshapità mwi3 emu ku mvensà wa 9. Nudi ànu pa dibeji dimwèdimwè adi mu Bible wanyì. Mvensà wa mwandamukùlù bwà kubanga nendè:

Ewu udi wenza mpèkaatù ngwa dyabùlù; bwalu dyabùlù ngwakenza mpèkaatù ku cibangidilu. Bwà kiiipàcìlà aka Mwànà wa Nzambi mumwènèshiiibwe, mbwà wàmòna mwà kubùtula byenzedi byà dyabùlù. (Ànu cìmvwà munkaci mwà kwamba aci, nwamònu's, Nzambi ùdyànjlila kulongolola, mukumanyè.)

Ewu yònsò udi mulediibwe kùdi Nzambi kàtu wèna mpèkaatù to; bwalu dimiinu dyèndè didi dishàala munda mwèndè: nè kèna mwà kwenza mpèkaatù to, bwalu ùdi—ùdi—bwalu mmulediibwe kùdi Nzambi.

¹⁴² Aci's ke cidi Dîyi dyamba. Mpindyewu, bu nwènu mwà kutàngila apa nùнку.

Twètù twamba nè...katwèna benzè mpèkaatù to, tudi tumuvwija mwena mashimi, nè dîyi kadyèna munda mwètù nànsha.

Mpindyewu, bàmwè bantu bàdi bàmba nè: “Èè mpindyewu, s'ki mwànà mukèsè wa bakàjì mwìmpè nyéyè ewu anyì mwànà mukèsè wa balùme mwìmpè. Kacya kabàtukù banjì kwenza mpèkaatù to twamb'eku twamb'eku.” Udi mulela mu mpèkaatù, mufwimba mu bubì, mulwè pa buloba mwikàle wamba mashimi. Paùdi ulediibwa pa buloba ebu, udi mwena mashimi, udi mwìbì, udi cyònsò cidìku aci, ànu mpèkaatù yònsò ewu, kì mwìbì to, bwalu kwèna mwìbè to. Kàdi udi—kàdi udi nè... Kwèna mwena mashimi to, bwalu kwèna mushimè to. Kàdi nyumà awu ùdi munda mwèbè paùdi ulediibwa, bwalu udi wa pa buloba. Ke bwà cinyi kwèna mwà kwenza dilongolola, bwà kulongolola to; bikèngela ùfwe bwà ulediibwè. Nènku kwèna mwà kupeta

dilediibwa kakùyi dipoopediibwa pa nkùrusè nànsha. Kwèna mwà kupeta dibiikà dyà ku lufù to; udi nè cyà kupoopediibwa pa nkùrusè ku bintu byà pa buloba bwà kubìshiiibwa ku lufù mu Kilistò.

¹⁴³ Bu wèwè mwà kweyemena mmwènenu yèbè–yèbè yà mamanya à mu mitù ayi nè bikwàbò, kwàdyakulediibwakù ku Nyumà wa Nzambi to. Bikèngela ùpwe mwoyi, bu mwàkenza Pòlò, cyònsò civwàyekù mumanyè aci, nè kubènga kumanya cìngà cintu munkaci mwènù pa kuumusha Kilistò Yesù, nè mulediibwe mupyamùpyà, cyàkàbìdì. Kaa, bu . . . Mwab'ewu . . . Bu mémèkù mwà kunùfikishilaci. Nwamònu anyi? Ndilediibwa didì dyènza lukòngò lupyalyùpù- . . . bufùki bupyabùpyà. Mwàkù mene wà cyena Ngelikà kaaba aka, bu mùmvwà ngùkèbela mu nkòngamyakù wa cyena-Ngelikà ditùkù adi amu, mwàkù *dilediibwa* mbwena kwamba nè “bufùki.” Pàdiye wamba nè: “Nudi bifùkiibwà bi–bipyabipyà mu Kilistò Yesù,” kùdi mwàkù mwaba awu, *cifùkiibwà's* ke mwàkù *bufùki*. Udi *bufùki* bupyacìpyà, kì mmu buloba to, kàdi mu Kilistò Yesù. Udi muvwijiibwe mupyamùpyà.

¹⁴⁴ Mpindyewu, wèwè's uvwa mu buloba wamba nè, kaa, udi mumanyè's, bintu bilenga, bilàmbà bimpè anyi cintu kampàndà cyà cilenga aci. Nè: “Kyah!” Ntèndeleelelu ùdi ku luseke. Nwamònu anyi? “Kaa, mémè's ntu nya mu èkèleeziyà, bushùwà's. Ncyèna muswè kuya mu ifernò to, kàdi udi mumanyè's. . . .” Nè mèsù malenga mafikùlùke à mwànà wa bakàji, anyi tusuki tukesè twà mvwàngalà twà mwànà wa balùme, anyi yèyè's ùdi menemene, nudi bamanyè's, cintu kampàndà cikwàbò, ànu cintu kampàndà cyà kukòka ntèmà, anyi cyà dyalakana, anyi unwa maalà, anyi cintu kampàndà anyi cikwàbò kuntwaku. Aci's ke buloba; udi—udi pa buloba. Nè Bible mmwambè nè: “Wèwè munangè maalù à pa buloba nè bintu byà pa buloba, dinanga dyà Nzambi kadyèna nànsha mene munda mwèbè to.” Pa nànkù bwà kupàtula aci mu wèwè, bikèngela ùfwe, bikèngela bwà kufwà, kupoopediibwa pa nkùrusè, nè kujiikiibwa, nè kubìika ku lufù bufùki bupyabùpyà mu Kilistò Yesù.

¹⁴⁵ Mpindyewu, bangabanga nè wèwè kupeta Nyumà Mwîmpè, udi witabuujà *mu* Mwoyi wà Cyendèlèlè. Kàdi kwèna nè Mwoyi wà Cyendèlèlè to too nè pawùdi upeta Nyumà Mwîmpè, bwalu Yèyè ùdi Mwoyi wà Cyendèlèlè. Nyumà Mwîmpè n'Nzambi; M'Mwoyi wà Nzambi munda mwèbè. Dìbà adi udi nè Mwoyi wà Cyendèlèlè. Nudi nuumvwa aci mpindyewu anyi? Nwamònu anyi? Tàngilàayi! Nwamònu anyi? Nudi nwitabuujà *mu*.

¹⁴⁶ Anji indilaayi, cintu cimpè ncyòci eci. Nwènù bakàji nùmfwilèku luse bwà bwalu ebu piikalaci cimwèka cyà ciipanshi menemene (nwamònu anyi?) . . . kutòkeshà bwalu. Maamù: kùdi mwoyi, kàdi nànsha nànkù, mwànà awu kì mmulediibwe to. Kàdi wèwè mutàbàlèlè mwànà awu mùdibi bikèngela nè mulonde mikenji yà bufùki, mwànà awu nealediibwè

bîmpè menemene. Kàdi wêwè kùyi mutèèke kantu nè kantu bilondëshile mikenji yà bufùki, ulekela utàpika, anyi upeta cisùùsù, anyi—anyi cintu kampàndà cyènzeka, neci—neci—necimushipè (nwamònu anyi?); necishipè mwànà awu kumpalà kwà kulediibwayè.

147 Èè, ke lutàtù lùdìku alu's. Mpùtá yidi yifùmina kùdì Sàtaanà. Sàtaanà ùdi wàngata mikete yà lulengu yà mu ifernò nè ùteeta bwà kutàpa Èkèleeziyà udi mu bisaamà nè mwànà awu munda. Nènku kumpalà mene kwà kulediibwayè, yidi yimushebeya. Kàdi wêwè mwangàte ànu Bible nè mumudiishe mu—mumudiishe cyàkudyà cyà mwànà, maamù awu wàngata vitàminè. . . Èè, eci ke Vitàminè wa mutàmbe bwimpè ùndiku mumanyè, Vitàminè wa nyumà. Nwamònu anyi? Ùdi ùkwibaka.

148 Mpindyewu, bìvwa bikèngela bwà èkèleeziyà kwikalayè wàngata Vitàminè yà nyumà; nè Vitàminè yidi apa mene, Mukàndà mujimà mùle tètè naayi. Nè udi nè cyà kwikala wangata Vitàminè yà nyumà, ulonga, nè aci cidi citwàla mwànà awu ku dilediibwa. Nudi numòna cìndi muswè kwamba aci anyi?

149 Mpindyewu, mukwàcikwètù mukesè ewu, pàdiye—ùdi—ùdi nè mwoyi—ùdi—ùdi nè mwoyi, bwalu tubùlù tukesè twà mashi tùdi tùnzunga nè tùtuutakana paanyimà pàa ngondo mitwè ku yisàtù nè—anyi yinaayi. Nè pashiishe, ke kutuutayè eku nè eku kàdi kí mmwanji kulediibwa to. Kàdi pàdiye ànu ùfikishiibwa pa buloba, ngàngàbukà, maamù, anyi muntu kampàndà, ùdi ùmukwata nè [Mwanèètù Branham ùdi ùtuutakaja byanza—Muf.] ùdi ùmutuuta kaadipi kakesè. “Ngwà!” Ke yèyè udi udila awu (nwamònu anyi?), nè pashiishe ùbanga kweyela. Nènku pàdiye ànu ùtwàdija kweyela mweyelu wà mwoyi, dîbà adi ùdi ùlwa musùukà wùdi nè mwoyi.

150 Nènku aci ke cidi misangu mikwàbò. . . Nudi badìlongòlòle bwà kwakidila Nyumà Mwîmpè anyi? Udi munkaci mwà kudinyènga; udi ujinga kulediibwa. Mbanganyì mwaba ewu bàdi mu mùshindù awu patùdi twakulangana apa mene, bàjinga dibàtiiza dyà Nyumà Mwîmpè, bàdi bulelèlà baswè kumanya cìdici, baswè kubwela—kubwelamù? Udi muswè dibàtiiza dyà Nyumà Mwîmpè nganyì? Elàayi byanza muulu. Nwamònu anyi? Udi mu didinyènga bwà kulela, udi ujinga—udi ujinga kulediibwa. Cidi cikukèngela ndipì dikesè dyà Èvànjeeliyò, kaacintu kakesè kàdi [Mwanèètù Branham ùdi ùtuutakaja byanza—Muf.], nè wêwè kwela lubilà lukolè nè: “Butumbi's wè!” Nènku pàdibi byenzeka. . . Ndi mumanyè nè nudi nwela meeji nè ndi mupâlè, kàdi tudi—tudi nè meeji à Kilistò àdi bupâlè kùdi bàà pa buloba twamb'eku twamb'eku. Cintu kampàndà cidi cyèlamù lubila, dîbà adi Nyumà awu ùdi ùkujikuka. Pashiishe Udi ùtùngunuka ànu nè kulwa.

151 Bu mùmvwà mwambile muntu kampàndà, mbyenze bu mulonda wà kale mujibàkàne. Nènku upicishilamù lukànu, nè

upyà lukànu elu wenza nè: “Zik, zik, zik.” Nè kùdi dizòloloka dinène dyà màyi didi dîteeta bwà kupicilamù. “Zik, zik,” kwèna mwà kucipeta to, kàdi udi mumanyè nè kùdi cintu kampàndà muntwamu. Udi mwà kucilenga; cidi lwà ku ndekeelu aku. Pashiishe paanyimà pàà katanci ucipèèsha nkòkelu munène wa menemene, ki: “Swah!” ke màyi àlwalwà mu mulonda awu aa. Ke mùdibi nàнку. Dìbà adi màyi àdi ànu àtùngunuka nè kulwa. Ke mùshindù awu wùdi Nyumà Mwìmpè nàнку. Mpèkaatù ùvwa mujike milonda ayi. Wèwè—wèwè udi ushààdila musòmbe paanyimà wamba nè: “Ndi nè lumùmàmùmà. Nudi bamanyè’s, ncìvwa ànu mwà kwamba nàнку to. Ndi ncìina nè bantu kabàlù kwela meeji nè ndi munsantu mubùnguluki wa mu malaba.” Nwamònu anyi? Aci’s . . .

¹⁵² Mpindyewu, paùdi umvwa ànu dikòkiibwa dikesè dyà Nyumà adi . . . Udi uMujinga kutàmba mwoyi—udi ujinga kutàmba nè mwoyi wèbè mene. Udi nè mushinga wàbùngì kùdi: “Bikèngela mMupetè cyanààna ndi mfwà.” Katanci aka anyi udi ubàkula cintu kampàndà. Wamba nè: “Ke cyòci aci, Mukalenge.” Udi ulamuna cijìku aci. Yoyòyò! Ki yèyè ulwàlwa ewu’s! Mmulwilèmu! Kaa, ekèlekèle! Mudishikàmìne! Èyi! Ekèlekèle, nànsha byòbì nè Mfùmù wa ditùnga Eisenhower ùvwa musòmbe kaaba aka. Ndi mufwànyìne kwamba nè: “Butùmbì kùdi Nzambi, Mashì Èndè neàkusùngilè.”

¹⁵³ Peetèlò nè bakwàbò abu bàvwa lwà kuntwaku ku Mpenta bàsokome, bàmba nè: “Pongwèlaayibì pambèlù pàà ciibi ànu bipeepèle menemene, nùmonè ní kùdi bàmwè bàà ku beena Yudà abu munkaci mwà kulwa.”

“To. Ncyèna mmòna nànsha umwe wa kùdìbo to.”

“Èyo, yikàlaayi bapuwè menemene, bakwètù, ndi nnwàmbila’s, bòbò ànu babànde kuulu eku, nebàtùpulùmùnè bàtwelè pambèlu. Ke cyònsò cidiku aci. Kanùyì kule to.”

¹⁵⁴ Bàvwa bònsò basòmbe mwab’awu, ke dyàkàmwè kulwakù cyonà cifùmìna mu Dyulu cyenzè bu cipeepèlè cìkolè cyà cìvuma. KubangaCì kuuja nzùbu mujimà mùvwàbo basòmbele amu. Cintu kampàndà kubanga kwenzeka. Kupàtukabo mu nzùbu amu; kukàngulabò biibi abi bàmba kubiiimànsha, bènda bàpwèka mu bibàndilu amu bènda bàtètuka bu musùmbà wà bantu bakwàcìke maalà mwìnshì mwà bwenzeji bwà Nyumà, ànu mbilà mimònàngàne nè dyenza dyà maalu à lukutukutu.

¹⁵⁵ Kwambabò nè: “Bantu aba mbakwàcìke maalà. Bàtèlèlèjaayi. Tàngilàayi muntu mutulùmùke uvwa ùtàngila pambèlù pàà ciibi awu, ewu wàkavila Yesù ku dipoopediibwa dyà pa nkùrusè kwàka awu. Wakamba nè: ‘Ncìvwa nànsha muMumanyè to.’ Mukàji mukesè kampàndà kwambayè nè: ‘Èè ngaakwilù webè’s ùdi ùkufùnda. Udi umwe wabò.’” Yèyè nè: “Wàkadìcipa, wamba nè: ‘Ncyèna muMumanyè to.’”

156 Kàdi pààkakòkiibwa nè kuumushiibwa cijiku aci, pààkabanga Nyumà kupòngoloka apu, wàkamba nè: “Nwènù bantu bàà mu Yudaàya, nwènù bàdì basòmbèle mu Yelusàlèrà, eci cimanyiibwè kunùdì nè ntèlèlèjaayi. (Amen!) Mémè ndi mfùmù. Eci cimanyiibwè kunùdì; bantu aba kí mbakwàcike maalà to. (Wàkwila èkèleeziyà wendès.) Bantu aba kí mbakwàcike maalà munùdì nwènù nudicinkila amu to, pa kumòna nè tucidi ànu pa díbà citèemà dyà ditùkù, kàdi eci ncyàkambàbo kùdì mupròfeta Yowèlè nè: ‘Nebyènzekè mu matùkù à ndekeelu, mùdì Nzambì wàmba, nè Nèngìcìkijè Nyumà Wanyì pa mubidi wònsò. . .’” Um-m-m, ndishìilangana kaayipu’s wè! Yoyöyò! Ekèlekèle, ndi mumanyè nè nudi bafwànyine kwela meeji nè eci ncintu cyà cikwàcisha bwòwà, kàdi ndi—ndi—ndi nè cyà kunùfikisha ku dimòna cìdì Bulelèlà. Shàalaayi naaCì.

157 Mpindyewu, cyà bushùwà, udi nè Mwoyi wà Cyendèlèlè.

158 Mpindyewu, bwà kuumvwija eci. Eci, wàmba. . . “Twètù twamba nè katwèna benze mpèkaatù to (‘Bònsò mbenze mpèkaatù nè mbapangile butùmbì bwà Nzambì’) tudi tuvwija Nzambì mwena mashimi.” Yèyè wàkamba nè nudi benze mpèkaatù. Nwènù nwamba nè kanwèna benze mpèkaatù to. . .

159 “Mvwa—mvwa mulediibwe mu èkèleeziyà wa ba-Baptistes, èkèleeziyà wa ba-Méthodistes, èkèleeziyà wa beena Mpenta, èkèleeziyà wa ba-Presbytériens; ndi mulediibwe. . .” Aci kaciyèna nè cidìci cishintulula to nànsha kakesè, bìdì bìkèngela ùlediibwè kuumukila mu cyòci cyàkàbìdì. Ncyà bushùwà. Twètù twamba nè katwèna benze mpèkaatù to, nudi nuMuvwija mwena mashimi. Nè Dìyì, dìdì Bulelèlà adi. . . Mbanganyi bàdì bamanyè nè Dìyì m’Bulelèlà? “Ku cibangidilu kwàkadi Dìyì. . . nè Dìyì dyàkavwijiibwa mubidi, nè Dìyì. . .” “Ùbàjidilè, Taatù, ku Bulelèlà. Dìyì Dyèbè m’Bulelèlà.” Nè Yèyè ùvwa Dìyì. Nwamònu anyi? “Nènku Dìyì, anyi Kilistò, kèna munda mwèbè to.” Yèyè ùvwa Dìyì. Mbanganyi bàà kunùdì bàdì bamanyè nànkù? Nwamònu anyi? Èyo.

160 Netùcibalè mùshindù ewu díbà adi nè: “Nwènù nwamba nè kanwèna benze mpèkaatù to, nudi nuMuvwija mwena mashimi, nènku Kilistò kèna munda mwètù to.” Nwamònu’s, nwamònu anyi? Mpindyewu, aci, nwamònu’s, paùdì wamba nè udi mwenze mpèkaatù. . . bwà nè kwèna mwenze mpèkaatù to, udi mupìile. Bìkèngela ùlediibwè cyàkàbìdì.

161 Mpindyewu, netùbuululè kaaba aka ku mvensà mukwàbò ewu. “Yèyè. . . Ewu yònsò udi mulediibwe kùdì Nzambì kàtu wènza mpèkaatù to, kàtu wènza mpèkaatù to, bwalu. . .”

162 Mpindyewu mpèkaatù ncinyi? Wàmbi nànkù awu nganyi, muntu kampàndà? Bupidyà. Aci ncidì Bible mwàmbè. Kùdì mpèkaatù ànu umwèpelè, nè mwinè awu mbupidyà. Ncyà

bushùwà. “Ewu udi kàyì wìtabuuja mmumanè kupiìshiiibwa.” Nwamònu anyi? Pa nàнку twètù, mpèkaatù mulelèlà umwèpelè.

¹⁶³ Mpindyewu, wèwè wamba nè: “Èè mpindyewu, anji indilà kakesè. Ndi ngiitabuuja nè mbafwànyine kupeta Nyumà Mwímpè mùshindù awu mu matùkù awu, kàdi ncyèna ngiitabuuja nè bìdi nàнку mpindyewu to.”

¹⁶⁴ “Kàdi, mwanèètù, Bible mmwámbe nè: ‘Mulayi wùdi kunùdi nè kùdi bânà bèènù balela.’”

“Ndi mumanyè, kàdi...” Udi munkaci mwà kwenza mpèkaatù. Udi munkaci mwà kwenza mpèkaatù ànu mwaba awu mene. Udi ubènga kwitabuuja cidì Nzambi mwámbe.

“Yesù Kilistò umwèumwè awu makèèlèlà, leelù, too nè kashidi.”

¹⁶⁵ “Èè, to, tudi balongèshiiibwe nè...” Cyùdi mulongèshiiibwe nànsha ciikàle cinyi. Bible mmwámbe—Yèyè wákamba nè: “Dìyì dyà muntu yònsò diikalè mashimi kàdi Dyànyi dilelèlà.” Èyo.

Wèwè udi wamba nè: “Èè, Yèyè—Yèyè’s ùdi umwèumwè awu mu tunungu, kàdi mémè ncyèna... Udi uswa kwamba nè Yèyè ùdi umwèumwè awu anyi?”

“Èyowà, mu Èkèleeziyà wènza bintu bìmwèbìmwè byàkenzàYe pàvwàYe pànwapa abi.”

¹⁶⁶ “Kaa, ncyèna mwà kwitabuuja aci to.” Udi munkaci mwà kwenza mpèkaatù. Udi munkaci mwà kwenza mpèkaatù. Nè ewu udi mulediibwe kùdi Nzambi, ku Nyumà Mwímpè, kèna wàmba bintu abi to. Nèku yèyè wàmba nè ùdi nè Nyumà Mwímpè nè mwikàle wàmba bintu abi, ke cileeki cyà nè kèna Nèndè to. Cidiye mwenzè nànsha ciikàle cinyi. Yèyè kàyì wìtabuuja dyondopa dyà kùdi Nzambi to, kàyì wìtabuuja Bukolè bwà dibiiikà dyà ku lufù to, kàyì wìtabuuja Nyumà Mwímpè mwikàle munkaci mwà kwicikijiibwa pambidi pèètù ànu menemene mwàkiicikijàYe mu cikondo cyà kumpàlà amu, ànu Nzambi umweumwe awu makèèlèlà, leelù, too nè kashidi, bintu bìmwèbìmwè byàkenzà bapostòlò abi munkaci mwà kwenzeka mpindyewu mene, dyakula dyà mu myakulu, nè dicyònkomo, nè bintu bikwàbò byònsò ebi; yèyè kàyì mwitabùùjà aci to, kí mmulediibwe kùdi Nzambi to. Bwalu ewu yònsò udi mulediibwe kùdi Nzambi kàtu wènza bintu byà mùshindù awu to. Ke mùshindù wà kwamba nè mbalediibwe kùdi Nzambi àwu.

¹⁶⁷ Wèwè muyè kùdi muntu kampàndà wamba nè: “Docteur Ph. *Kampàndà*, Révérend Docteur *Kansanga* (bìdi ànu bilenga, mvwa kujinga nè ngikalakù naabi, mapòlomè awu’s), kàdi mbyà bushùwa nè dyondopa dyà kùdi Nzambi adi òvwà nè cyà kutùngunuka mu èkèleeziyà ànu mwàkenzà bapostòlò amu anyi?”

“Kaa, to, to!” Yèyè ùdi munkaci mwà kwenza mpèkaatù. Mmwena bupidyà. Ncyà bushùwà.

168 Wêwè udi wamba nè: “Udi witabuuja nè tudi tupeta Nyumà Mwîmpè mwàkapetàbo mwaba ewu anyi? Mvwa munkaci mwà kubala mu Bible emu mu Byenzedi 2 mwaba wùvwaYe mwambe nè bàvwa . . . bapòngolole Nyumà Mwîmpè awu, nè bààkatetuka byenze bu nè bàvwa bakwàcike maalà, ke kupàtukabò kuntwaku nè kwakulabò mu myakulu yà bantu aba, nè bintu byà mùshindù awu; benza maalu bu bantu bàvwà bakwàcike maalà, ke èkèleeziyà kudyàmbidila nè bàvwa bakwàcike maalà. Patùdi tupeta Nyumà Mwîmpè leelù ewu mu èkèleeziyà wa ba-Baptistes, ba-Baptistes bèètù, ba-Méthodistes bèètù, ba-Presbytériens bèètù, cyònsò cidici cifwànyine kwikala aci, ncyèna—ncyèna mmòna twètù twenza nàнку to.”

“Èè, ndi nkwambila’s, mwànà wetù, aci’s cìvwa ànu bwà dikùmi nè bàbìdì abu.” Udi munkaci mwà kwenza mpèkaatù. Kì mmulediibwe kùdì Nyumà wa Nzambì to, bwalu Bible mmwàmbè nè: “Ewu udi mulediibwe kùdì Nyumà wa Nzambì kàtu ùbènga kwitabuuja to. Mmwenà kwitabuuja, nè kèna mwà . . .” Bwà cinyi? Bwà cinyi? Kaa, s’ki cyòci eci. Nkuci ùdi munda mwèndè, ùmulombola. Bwalu Nyumà wa Nzambì ùdi munda mwèndè, nè yéyè kèna mwà kuCivila to; kèna mwà kucivila to. Cyòci ciikàle Nyumà wa Nzambì, Nzambì kààkuvilakù Dìyì Dyèndè Yéyè mwinè to. Mémè muvilè dìyì dyànyì mémè mwinè, dìbà adi ndi ndwa mwena mashimi. Nènkù wèwè—nènkù wèwè wamba nè udi nè Nyumà wa Nzambì kàdi uvila Dìyì dyà Nzambì, anyi Nzambì m’mwena mashimi anyi wèwè ke mwena mashimi, ewu anyi mukwàbò. Nè Bible mmwàmbè nè: “Dìyì dyà muntu yònsò diikalè mashimi kàdi Dyànyì diikalè Bulelèlà.” Nè muntu udi mulediibwe kùdì Nyumà wa Nzambì kèna mwà kubèngangana nè Dìyì dyà Nzambì to; bikèngela àmbè nè n’Dyà bushùwà. Kèna mwà kwenza cìngà cintu nànsha cìmwè to. Yoyòyò! Eci’s—eci’s m’Bulelèlà.

169 Tèelejàayi, ngànji mbalèbi cyòci eci cyàkàbìdì.

Ewu yònsò udi mulediibwe kùdì Nzambì kàtu wènza mpèkaatù to; bwalu dimiinu . . .

170 Dimiinu dyà Nzambì ncinyi? Mulayi wùvwà naawù Abraham, dimiinu adi, kùdì dimiinu adi. Dimiinu adi ncinyi mpindyewu? Kilistò. Kilistò ke Dimiinu dyà Nzambì anyi? Yéyè ùdì Dimiinu dyà nganyì pìikalàYe kàyi nàнку to? Èyo, èyo. Yéyè ùdì Dimiinu dyà Nzambì.

171 Dimiinu dyà Nzambì dìdì dishààla munda mwèndè. Nyumà Mwîmpè ùdi ùlwa bwà kushààla, kì nku disangisha nè ku dikwàbò to, kàdi bwà cyendèlèlè. Mpindyewu, nwènu baswè kufùnda Mufùndu wènu bwà cyòci eci, Efèsò 4.30: “Kanùbungamiji Nyumà Mwîmpè wa Nzambì unùdì batwibwe nendè cìtampì too nè ku ditùkù dyà bupikudi bwènu to.” Dimiinu dyà Nzambì dìdì dishààla munda mwèndè, nè yéyè kèna mwà

kwenza mpèkaatù to, bwalu yèyè mmulediibwe kùdi Nzambi. Kèna mwà kubènga kwitabuuja Dìyì dyà Nzambi nànsha.

¹⁷² Mpindyewu, panùdi numòna muntu ùbengangana nè Dìyì dyà Nzambi wàmba nè: “Kaa, aci’s civwa mbwà cikondo cikwàbò,” pàdibi nè mulayi wùdi bwà ewu yònsò udi muswè awu àlwe, vùlukàayi ànu nè, yèyè awu mmwena bupidyà nè kí ngwa kùdi Nzambi nànsha.

S’mbìmpè bwà twètù kwimanyika apa, kí mmwòmò anyi? Tudi díbà kaayi? Kaa, ekèlekèle! Ndi nè—ndi—ndi ànu—ncyèna muswè kupingana apa mu dyàlumingu nànsha. Lekèlaayi ngàngate eyi ànu nè lùkàsà bulelèlè, bulelèlè, bulelèlè menemene. Ndikù mwà kucyènza anyi? Bidi ànu bimpè be. Kanwènaku nwela meeji nè mbìmpè anyi? Kaa, Dìyì dyà Nzambi’s. Èyo.

Mwanètù Branham, muntu ùdi nè cyà kwenza cinyi. . .

Ngànji ndulamè bwà lwikalè lwà ndekeelu, ngàngatè elu kaaba aka.

105. Netwikalè nè mmwenekelu kaayi mu dibìikà dyà ku lufù?

¹⁷³ Mutùvwà patwàkapwekà apu. Menemene, dibìikà dyà ku lufù. . . Anji elàayibi ànu—ànu meeji ku bwalu ebu. Mukàndà ewu wùdi wùmata panshi, nè mèmè ndi ngàngata mukàndà ewu, mukàndà mushiilàngàne, nè kuwùpingaja pa wòwù ewu. Aci kí ndibìikà dyà ku lufù to. *Dibìikà dyà ku lufù* didi “kupingaja wùmwèwùmwè wàkapweka mu buloba awu.” Yesù wàkabiika ku lufù anyi? BààkaMumanya anyi? Yèyè ùvwà mwimàne pàmwè naabò, Yesù umwèumwè awu anyi? “Nènku Yesù umwèumwè uvwa mwàngaciibwe muulu ewu, neàlwe cyàkàbìdi mu mùshindù wùmwèwùmwè wunùdi baMumòne ùya awu.” Dibìikà dyà ku lufù didi ànu bu paùdi ufwà; ke mùshindù wùdi ubiika ngwòwò awu. Wèwè udi ufwà bu muntu mu mubidi; udi ubiika bu muntu mu mubidi. Aci’s mmwòmò menemene. Pa nàнку dibìikà dyà ku lufù didi ànu mwomùmwè. Tudi bafwànyìne kupicishilapù mèbà makwàbò àbìdi, kàdi mbitàmbe bwìmpè twètù katùyì babangè to.

106. Umvwijàku Ebèlù 4 nè 6 (Ànu lùkàsàlùkàsà mpindyewu, tudi twangata eci nè lùkàsà lwònsò.) nè kucipàlakaja nè Ebèlù 10.26—Ebèlù 6 nè 4. (Numfwilaayikù luse, 6.4, nè 10.26. Tùmonèbi, 10.26; èyo, ndi naayi mwab’ewu mene. Nwamònu anyi?)

Bwalu kabyèna mwà kwenzekakù to bwà aba bàkaavwàku bamana kukenkeshila, nè balabùle. . . mapà à mu dyulu, nè barwijùbwe baabanyanganyi bàà Nyumà Mwìmpè,

Nè biikàle balabùle dîyì dîmpè dyà Nzambi, nè makolè à buloba bùcìlwalwà,

Bôbò badishinde . . . bwà kudyàlujululabò bôbò biine cyàkàbìdì ku kanyinganyinga; pa kumòna nè bàdì bàpooopela cyàkàbìdì bwàbò bôbò Mwànà wa Nzambì pa nkùrusè, . . . nè bàmfwisha bundù bwà patòòke.

¹⁷⁴ Aci cidi cìtùngunuka ànu nè kwamba cidìci . . . Mpindyewu tàngilàayi. Mwua nè alu dilòòlò adi. Mbanganyi bàvwà mwab'ewu pangàakacyùmviwjà? Èyo, dibà adi nudi bamanya nè ncinyi ciine aci. Nwamònu's, mbeena kwitabuujà bàà ku mikàlu abu.

¹⁷⁵ Mbanganyi bàdì babalè mu Dutèlònòma 1 amu, mùvwà batentekedi abu babwele ànu muntwamu nè balabùle bintu byà ku Kaanààna amu, cidi Kaanààna kî ncifwanyikijilu cyà Bukalenge bwà bidimu cinunu to. Mbanganyi bàdì bamanyè nànkù? Udi muswè kwamba nè, ànu cyanza cimwè cyanààna? Junie. Ncyà bushùwà. Kaanààna kî ncifwanyikijilu cyà Bukalenge bwà bidimu cinunu to, bwalu bàvwà nè mvità, dilwangana dyà mvità, dishipangana, nè bikwàbò byònsò mu Kaanààna. Cifwanyikijilu cyà cyà Cijila—Kaanààna ncifwanyikijilu cyà Nyumà Mwímpè. Èjiipitù ke buloba bwàkapàtukilàbo abu. Cipèèlè ke mwaba wàkajidiibwàbo, Èkèleeziyà mubiikidiibwe bwà kupatuka. Kaanààna ke mwaba wàkasòmbèlèbo nè Nyumà Mwímpè (nwamònu's, nwamònu anyi?), bwalu bàcìvwa ànu nè mvità. Nènku nwènù kanùyì nwitabuujà nè nudi nè mvità to, petàayibi ànu Nyumà Mwímpè musangu wùmwe.

¹⁷⁶ Cyùdì wenza ncinyi? Udi wenza cinyi mu Kaanààna? Bàvwà nè makenji àbò. Butùmbi's wè! Bàvwà nè makenji àbò. Nè kabàvwa mwà kwangata makenji àbò to ànu too nè pàakabwelàbo mu Kaanààna. Kabàvwa nè cintu nànsha cimwè mu cipèèlè to. Pashiishe, pàakabwelàbo mu Kaanààna, dibà adi bàvwà nè makenji. Nè twètù tudi nè makenji. Paùdì upeta Nyumà Mwímpè, udi mu Kaanààna. Bikèngela ùlwanganè bwà bwalu abu; katùpà nè katùpà kwònsò kàà buloba bikèngela ùkàlwangèènè. Èyowà's, mukalenge! Ke bwà cinyi bantu bàtu bàmba nè: "Mwanèètù Branham, nsambidilèku leelù ewu."

"Èyo, netùmonè . . ."

Dìdingebi ùbwelè mu Kaanààna musangu ànu wùmwe, mwanèètù, nènku's neùmanyè luseke lùdì. Tàngilà mùdì disambila dibanga kukùtuka. Èyowà's, mukalenge! Wèwè udi wamba nè: "Tàngilà kùnweku, Sàtaanà. Eci's ncyànyì mèmè! Ndi mwena eci nùnkù! Nzambì ngudi mwàmbè nànkù! Pàtukà! (Ncyà bushùwà, ncyà bushùwà!) Umùkà mu malaba àanyi!" Nwamònu anyi?

"Buloba bwèbè?" Mùdì Sàtaanà wàmba's.

"Ndi nè mukàndà wàci wà bwena-cintu mulelèlè wà kawùyì dyela mpatà to. Pàtukà! Kùyì mwenze nànkù to, nènkutwàdile mukàndà wà dikusopwèsha wà ku bulombodi bwà Nyumà

Mwîmpè.” Yèyè ùdi ùpàtuka. Bushùwà’s, ùdi nè cyà kwenza nàнку.

¹⁷⁷ Mpindyewu, mpindyewu, aba bàdì balabùle mapà à ku Dyulu abu, mpindyewu tàngilàayi apa nùнку:

. . . twètù benze mpèkaatù ku budiswìle . . . (wa 10, ewu ngwa 26 wa nshapità wa 10.) . . . twètù benze mpèkaatù ku budiswìle paanyimà pàà . . . twètù bapete dimanya dyà bulelèlè, kakwèna kùshààla kàbìdì mulàmbù bwà mpèkaatù nànsa,

¹⁷⁸ Mpindyewu, mwaba ùmwè wà ku yòyì mpaùdì ànu mucilabùle, nè ùdi ùlonda mpaùdì mucipète, nè mwikàle nè dimanya dyà cyòcì aci. Dìbà adi wèwè mwenza mpèkaatù (cinyì?), kùyì witabuujà to. Mpindyewu, tàngilàayi nùmonè mùdì yònsò yibìdì ayi yibàdiibwa. Nwamònu anyi? “Wèwè ubènga kwitabuujà ku bukolè paanyimà pàà wèwè mumanè kupeta dimanya dyà bulelèlè. . .” Mpindyewu lekèlè . . . Indilàbi kakesè, ndekèlaayi ncyangàtebi mwab’ewu.

Twètù badishinde, bwà kudyàlujulula twètù biinè . . .

. . . mbwalu bùdì kabùyì mwà kwenzeka bwà aba bàkaarwà bamana kukenkeshila musangu kampànda, nè balabùle mapà mîmpè à mu dyulu, . . . (Baàlabùle. Nwamònu anyi?) . . . nè barwijiibwe baabanyanganyi . . . (Nwamònu anyi?) . . . bàà Nyumà Mwîmpè,

Nè balabùle dîyì dîmpè dyà Nzambì, nè . . . makolè à buloba bùcilwalwà,

¹⁷⁹ Nèнку ùdi ùpweka too nè mwab’ewu nè wàmba nè wèwè musòmbemù buludi bu mùdì mingònga, pàdì mvùla ùlòka pa buloba misangu mivulè; wèwè musòmbemù bu mingònga, Nyumà Mwîmpè wàkamata, kàdi kaa ekèlekèle, wèwè kuMusankila ànu bu bakwàbò bònsò abu; kàdi bwà cidì citàngila kukùngamangana Nendè, anyi kukwàta njila kuya, nè kukwàcila Mukalenge mudimu, nè kwenza cintu kampànda bwà bwalu abu, to, to, kwèna mwà kwenza nàнку to. Nwamònu anyi? Dìbà adi aci cidì cileaja nè Nyumà wa Nzambì kèna munda mwèbè to. Nwamònu anyi? Pashiishe ndekeelu wa byònsò udi ànu udikàngila nkààyeebè pambèlu. “Bàdì ndekeelu wabù mwikàle kwoshiibwa.”

¹⁸⁰ Kàdi lwà apa nùнку, twètù tubènga kwitabuujà . . . Mpindyewu, mpèkaatù ncinyì? Bupidyà. Pìikalà cintu cimanyishìibwe kùdì, nè wèwè ucikoma nyimà ku budiswìlè bwèbè wamba nè: “Uh-uh, ncyèna naaci bwalu nànsa bùmwè to,” paanyimà pàà wèwè mumanè kucimòna, kacyàdyàkubìkilakù kàbìdì mwoyi wèbè to. Kwèbè’s nkujike; ncyà bushùwà. Udi—udi mwenze mpèkaatù mupicishe ditùkù dyèbè dyà ngàsà adi. Nwamònu anyi?

Bwalu twètù tubènga kwitabuuja ku budiswìlè... (Mpindyewu, mu Bible wanyì ndi naaci cifùnda kaaba aka mwaba wùdìci, cìdi nè—nè “m”, mēyì à kumpengà kwà—à kumpengà kwà dibèji awu, àdi àmba nè: mpèkaatù, bupidyà ku budiswile. Nwamònu’s, nwamònu anyi?)...ku budiswìlè paanyimà pàà... twètù bamanè kupeta dimanya dyà bulelèlè, kakwèna kùshààla kàbidì mulàmbù bwà mpèkaatù to, (Wèwè muumuke nè mubènge Nzambì ku budiswìlè bwònsò paanyimà pàà byònsò bimanè kuvwijiibwa bìmpè kùdi, nè Nzambì mukwambìle bwà kubyàngata. Nwamònu anyi?)


Kàdi ànu dindila dìdì dikwàcisha bwòwà dyà cilumbulwidi dyà ciiji cyà cìlakuka kapyà, cyàbùtulà mulwishì.

Ewu uvwa upeetula mikenji yà Mòsà uvwa ufwa kakùyì luse to ku bujaadiki bwà bantèmù bàbidì anyì bàsàtù:

...ambaayibi tung nè ndinyooka ditàmbe kwikala dikolè dyà mùshindù kaayi, dinùdi nucinka, diikala... mene dikumbanyine, ewu udi mudyatakàje Mwànà wa Nzambì ku makàsà, nè mubalè...cipungidi, kuvwàye mujidùbwe aku, bu cintu cyà patupù, nè...mupeetule byenzedi byà ngàsà? (Kaa, ekèlekèle!)

¹⁸¹ Nebiikalè cinyi? Muiishi, mwambi, twangataàyi ànu... Bwalu mèmè ndi muiishi, twànjààyi kwamba nè mmuiishi. Ùdi ùbànda kùnweku, ùdi ùbànda, nè ùjikula Kelistò, ùkezula mwoyi wèndè, mwaba wùdiye kàciyi nè nsòmbelu wa masandi nè bintu bikwàbò to, mwikale nè nsòmbelu mukezuke, ùseemena mwab’ewu; ngàsà wa Nzambì uvwa mwìmpè kùdiye, pashìishe ùbànda buludì mu dimanya dyà Nyumà Mwìmpè (nwamònu anyi?), ùseemena, Nzambì ùdi ùmulombola buludì too nè ku dimanya dyà Nyumà Mwìmpè, nènku’s ki yèyè udi uCimòna awu, kàdi yèyè ùdi wàmba nè: “Mpindyewu, anji indilà kakesè. Wanyì ekèleeziyà kì mmufwànyìnekù kwitaba aci to. Uh-uh. Ncyèna mufwànyine kwenza aci to. Mbafwànyine kungiipata. Nsangilu awu—awu ùdi mufwànyine—mmufwànyine kungiipata. Disangisha dyà bambi dìdì dilondà, mèmè’s ndi mufwànyine kwipaciibwa.” Kì nkushààle kàbidì mulàmbù bwà mpèkaatù, bwalu mmwangàte Mashì mene àvwà mamujidile awu nè mamutwàle too nè mwab’ewu, ku dimanya dyà Bulelèlè, nè kuÀvwija bu nè Cìvwa cintu cìvwà kaciyi cikumbànyine to nè kuÀdyatakaja mwìnshì mwà makàsà èndè, paanyimà pàà Nzambì mumulombòle ku cidya nè ku cidya mwab’ewu kùdi Nyumà Mwìmpè.

¹⁸² Wèwè udi wamba nè: “Kaa, mpindyewu anji indilà kakesè, Mwanèètù Branham.” Anji indilà kakesè! Nyumà

wa mufwilakanyi nè Kilistò neénzè nànkù. Nuvwakù bamòne mitù yìbìdì ayi anyi? Yudaàsà Mpongoloki awu ùvwa nganyi? Dyabùlù's! Bible mmwambè nè yéyè ùvwa mwànà wa dibùtuka. Dibùtuka ncinyi? Ifernò. Yéyè mmwànà wa ifernò, mmufùmine mu ifernò nè muyè mu ifernò. Nè Yesù Kilistò ùvwa Mwànà wa Nzambi, mufùmine mu Dyulu, mwalùkile mu Dyulu. Pàakafwàbo bònsò bàbìdì ku—ku nkùrusè ayi...Ye... Nuvwakù bamanyè nè Yudaàsà wàkafwà pa nkùrusè anyi? Mbanganyi bàdiku bamanyè nànkù? Wàkafwàla ku mucì. Yesù wàkafwà pèndè ku mucì. Mmukòsa ànu cyanàànà, kwàjiki. “Mwediiibwe mulawu ng’ewu udi ufwà ku mucì.” Nènkù yéyè wàkafùmina mu ifernò. Nè tàngilàayi cidì...Pàvwàye ànu mwà kudifinda mu èkèleeziyà...Aci ki butùmbùke bùdiye mwà kufikakù mpindyewu. Nudi numòna mùdiye mufwànyine kwikala ùseeswishangana anyi? Mpindyewu, Yudaàsà kulwayè. Yéyè ùvwa cinyi? Mulami wa cibùcilu, mwanèètù kampàndà, mwikàle ùkwàta mudimu mu èkèleeziyà, mulami wa cibùcilu mu èkèleeziyà, wàkabànda too nè apa, mwitabùùje Mukalenge Yesù Kilistò, nè ùvwa mubingìshù- . . . 

59-1223 Nkonko Nè Mandamuna
Branham Tabernacle
Jeffersonville, Indiana États-Unis

CILUBA

©2026 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilsto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org